



于忠肅公集卷之十一

明錢塘于謙廷益甫著

雜體

擬古

妾意如冰清妾心如石堅良人久別離悵望空懸懸  
所感恩義重豈為情欲牽但願良人好功名遂超遷  
九重布恩澤四境無烽煙未卜會面期先遣佳音  
傳亦足慰岑寂何必常團圓

南國有佳人

詩集

卷之十一

南國有佳人皎皎冰雪姿恒恐污潔白臙粉弗敢施  
奉身事君子服勤忘燕私一朝成遠別千里長相思  
願托雙飛翼辛苦良不辭飛來侍君側恩義兩無虧  
永言執箕帚盡瘁以為期可望不可即翹首空嗟咨

遊春曲

垂楊拂地如青絲輕盈不奈東風吹馬上誰家游俠  
兒雕鞍玉勒黃金羈張弓放彈如星馳正中流鸞落  
樹枝衆中大笑稱絕奇揚鞭走馬當路岐忽聞鞦韆  
笑語嬉隔墻竚立情如痴墻裏佳人顰黛眉畱情不





語知伊誰分明相望不相知恨無羽翼通佳期夕陽  
啼鳥催分離可憐兩地空相思

春書曲

東風吹花花不定紅雨紛紛落芳逕喚人啼鳥隔紗  
窓巧語關情誰忍聽柔腸百結苦縈回却似丁香花  
未開花開花謝年年事可惜流光如箭催門外紅塵  
飛紫陌陌上垂楊弄春色垂楊只解送行人不管行  
人歸未得

採桑婦

詩集

卷之十一

二

低樹採桑易高樹採桑難日出採桑去日暮採桑還  
歸來喂葉上蠶箔誰問花開與花落二眠纔起近三  
眠此際祇愁風雨惡割雞裂紙祀蠶神蠶若成時忌  
苦辛但願公家租賦給一絲不望上儂身丁男幸免  
官府責脂粉何須事顏色收蠶猶未是閒時却共兒  
夫勤稼穡

採蓮曲

朝採蓮暮採蓮蓮花豔冶蓮葉鮮花好面顏不常好  
葉似羅裙怨秋早秋風浩蕩吹碧波綠怨紅愁將奈

何年年採蓮逞顏色採得蓮花竟何益蓮花雖好却  
無情夫婿有情常是客常是客萬里關河歸未得爭  
如池土錦鴛鴦雙去雙來到頭白採蓮復採蓮採蓮  
長可憐願比蓮花與蓮葉不論生歿根株連

楊花曲

垂楊飛白花飄飄萬里去多情蜂蝶亂追隨不問依  
棲向何處人生漂泊無定蹤一侶楊花趁暖風今朝  
馬足西邊去明日車輪又向東可憐不識歸來路一  
去江山千萬重楊花本是無情物懊惱人生在客中

詩集

卷之十一

三

遠別離

遠別離何時歸出門子女爭牽衣借問此行向何處  
底事欲畱畱不住父子恩情深更深可憐不得恒相  
聚遠別離無限愁山行騎馬水乘舟行人一去蚤回  
頭

折楊柳

折楊柳折得柔條持在手慙慙贈與遠行人人去書  
來莫厭頻明年柳發黃金芽却望歸轅早到家春來  
春去須臾事莫待漫天飛雪花折楊柳愁思多短長



亭畔崎嶇路送盡行人奈尔何

靜夜思

靜夜思何時休終宵展轉聽更籌人生由來不滿百  
安得朝夕事隱憂功名富貴倘來物目前渺渺春雲  
浮甲第歌鍾萬戶侯五花駿馬千金裘春風秋月不  
相待倏忽朱顏變白頭豪華一去難再得壯氣銷沉  
土一丘但令名節不墮地身外區區安用求靜夜思  
誰與謀勸君高枕且熟睡窮達由天不用愁

漁父辭

詩集

卷之十一

四

水深得魚多水淺得魚少人間徑路謾崎嶇天際煙  
波長浩渺山妻稚子幸團圓百歲生涯共一船收綸  
罷釣晚風前楊柳穿魚當酒錢酒酣日暮船頭宿醒  
看江水捧團玉浩歌一曲寫幽情欸乃聲中山水綠  
山水綠快我心船頭有魚可換酒莫管興亾與古今

節婦吟

淒涼復淒涼世間好事難久長月圓無奈陰雲蔽花  
發愁看風雨狂良人恩愛中道絕秋月春花空斷腸  
空斷腸心不移玉潔冰清天自知翁姑老病兒嬌癡

蕭然四壁無遺貲辛勤紡績事家業暮暮朝朝顰黛  
眉但願翁姑無恙兒成立獨抱窮愁甘受饑甘受饑  
淚成血九原無路見良人縱有衷情向誰說

出塞

健兒馬上吹胡笳旌旗五色如雲霞紫髯將軍掛金  
印意氣平吞瓦剌家瓦剌窮胡真犬豕敢向邊疆撓  
赤子狼貪鼠竊去復來不解偷生求速死將軍出塞  
整戎行十萬戈矛映雪霜左將纔看收部落前軍又  
報縛戎王羽書捷奏上神州喜動天顏寵數優

詩集

卷之十一

五

不願千金萬戶侯凱歌但願蚤回頭

入塞

將軍歸來氣如虎十萬貔貅爭鼓舞凱歌馳入玉門  
關邑屋叅差認鄉土弟兄親戚遠相迎擁道攔街不  
得行喜極成悲還墮淚共言此會是更生將軍令嚴  
不得住羽書催入京城去朝廷受賞却還家父子夫  
妻保相聚人生從軍可奈何歲歲防邊辛苦多不須  
更奏胡笳曲請君聽我入塞歌

採蓮曲



日出探蓮去日暮探蓮歸蓮花如面葉如衣船頭對  
對鴛鴦飛鴛鴦飛入花深處交頸綢繆無限趣觀物  
關情可奈何扣舷齊唱採蓮歌採蓮歌未休心中無  
限愁如何得似鴛鴦鳥雙去雙來到白頭  
東風北風吹  
北風吹吹我庭前柏樹枝樹堅不怕風吹動節操稜  
稜還自排冰霜歷盡心不移况復陽和景漸空閒花  
野草尚歲蕤風吹柏樹將何爲北風吹能幾時

春風吟

詩集

卷之十一

六

夕陽欲落還未落垂楊拂地東風惡東風雖惡還有  
情歲歲能令芳草生草生滿地綠侵衣時見堦前蛺  
蝶飛却怪東風無氣力春深不解動芳菲

春風吟

東風浩蕩吹花柳春氣薰人如醉酒草生滿地綠敷  
茵桃李無言也笑人笑人年年常是客底事欲歸歸  
未得歸未得可奈何太行南北千條路不似離腸宛  
轉多

眼前花

昨日看花開今朝看花落  
花開花落兩無情莫怪夜  
來風雨惡人生一似雨中  
花老少須臾莫怨嗟昨日  
朱顏生綠醕今朝白髮映  
烏紗看花對酒寧辭醉醒  
後還投賣酒家君不見眼  
前花

落花吟

昨日花開樹頭紅今日花  
落樹頭空花開花落尋常  
事未必皆因一夜風人生  
爲樂須少年老後看花亦  
可憐典衣沽酒花前飲醉  
掃落花鋪地眠風吹花落  
依芳草翠點臙脂顏色好  
韶光有限蝶空忙歲月無  
情人自老眼看春盡爲花  
愁可惜朱顏變白頭莫遣  
花飛江上去殘紅易逐水  
東流

田舍翁

田舍翁老更勤種田何曾  
辭苦辛雞皮鶴髮十指禿  
日向田間畊且斲雨暘時  
若得秋成敢望肥甘克口  
腹但願公家無負租免使  
兒孫受凌辱吏不敲門犬  
不驚老稚團圞貧亦足可  
憐憔悴百年身暮暮朝朝  
一盂粥田舍翁君莫欺暗  
中剝民膏脂人雖不語

天自知

詩集

卷之十一

七



醉時歌

酒滿金盃泛綠波主人半醉朱顏酡請君且就坐聽  
我醉時歌人生天地間一葦浮江河富貴與功名倏  
忽浮雲過牀頭有酒且須斟囊裏無錢不用尋錢多  
自古壞名節酒量何妨江海深劉伶好酒稱世賢李  
白騎鯨飛上天石崇元載極奢侈至今千載遺腥膻  
勸君滿飲不須辭萬事由天莫怨咨蛟龍變化非無  
日鴻鵠翱翔自有時醉時歌歌有節酒闌客散我還  
醒却上高樓對明月

詩集

卷之十一

八

獨酌

東風昨夜吹芳草綠漸成陰紅漸老庭前無數落來  
花分付家童莫輕掃開樽獨酌向花前仰面歌呼聲  
徹天花殘自有重開日人老何由更少年醉看明月  
照華顛還把落花鋪地眠牀頭貯酒三百斛囊底瀟  
條無一錢看花對酒且自樂一任春歸啼杜鵑

採桑婦

出門行採桑路逢游冶郎君馬上笑相問問儂何  
事不梳粧妾云本是農家婦辛苦從夫立門戶自來

不解施朱鉛但識荆釵與裙布郎君問妾妾不疑笑  
殺無端輕薄兒妾顏如花心似鏡玉潔冰清天自知  
世間萬物不得齊或清如水濁如泥請君前行不須  
問好把絲鞭促馬蹄馬蹄追風去若箭儂家掩袂淚  
如霰出門明日更相逢郎君避路羞相見

馬上郎

馬上郎青春好玉勒金羈映芳草茸茸觀落花  
花間亭館知誰家郎君下馬入門去紅裙翠裏畱春  
住畱春住可奈何笑語生香歡愛多烏雲高髻鬱嵒  
詩集  
卷之十一  
九  
峩樽前起舞影婆娑酒酣漸覺朱顏酡畱情兩眼橫  
秋波橫秋波情密密閭閻凍餒君不知夫妻對面厨  
中泣

處世若醉夢

處世若醉夢憂樂付等閑百事皆前定對酒且自寬  
仰天歌嗚嗚清風吹我冠濁醪滿瓦缶首宿堆春盤  
無人勸我飲自酌還自歡醉眠白日晚起看明月團  
拔劍舞中庭浩歌振林巒丈夫意如此不學腐儒酸

落花吟



東風吹落花點點依芳草多情還似未開時分付家  
僮莫輕埽埽却明朝又落來來年依舊見花開莫因  
開落分憂喜且向花前飲一杯

古意

妾顏如花命如葉嫁得良人傷遠別別來獨自守空  
閨夜夜焚香拜明月月缺重圓會有期人生何得久  
別離願將身托蟾蜍影照見良人不寐時

初日出東方光彩照八極飛潛及蠢動咸仰生成力  
我願天宇清浮雲埽形迹庶俾陽德亨萬古明不息

詩集

卷之十一

十

從軍五更轉

一更新月出城上箭初傳將軍號令急不敢倒頭眠  
二更天氣冷孤月照三軍誰奏胡笳曲淒涼不忍聞  
三更霜漸落城上聽寒雞仰面看星象天空北斗低  
四更城上望滿野是新霜衣薄弓刀冷那能不憶鄉  
五更人盡起鼓角動邊城聞道將軍令平胡要起營

圓明偈

明月無罣礙皎然在虛空恒河沙世界照耀一般同

大風

大風振林木萬葉皆飛颺如何頃刻間景物殊炎涼  
感之欲太息凭闌對斜陽東籬有黃菊歸來嗅餘香  
鯉魚圖

海波拍天流海日當天起神魚大如舟揚鬣復鼓尾  
崢嶸頭角信非難變化飛騰頃刻間等閑吸盡四海  
水化作商霖拯旱乾

閨思

東風蕩漾吹花柳春色醺人如醉酒梁間喜見燕將  
雛檻外忽聞鶯喚友綠窻倦繡且停針搔首沉吟意  
詩集

卷之十一

十一

轉深卻喚待兒開繡戶輕移蓮步傍花陰花陰滿地  
蝶雙飛相隨戀戀紅薔薇欲向花間撲雙蝶生憎綠  
刺牽人衣歸來長嘆臨粧鏡宛轉柔情還未定還未  
定誰得知須與鴉噪庭槐晚又是深閨拜月時

夏日憶故鄉風景

石榴樹底紅巾感蒼荀枝頭露香玉薰風拂拂自南  
來時向高堂埽炎燠細簾半捲日遲遲竹影叅差柳  
陰綠紅綃煥爛蜀葵開金彈纍垂盧橘熟端陽佳節  
競繁華角黍堆盤映醺醑一從遊宦隔天涯馬首紅



塵厭驅逐有時飛夢繞錢塘此景依然在心目今年  
夏月居晉陽南北風土殊炎涼清和已過近五月草  
木尤自愁飛霜故園物候不可見塵沙塞草空茫茫  
雲山望斷幾千里小樓盡日空徜徉

讀易

太極本無形陰陽互消長抱犧百王先作易原俯仰  
卦畫以一陳人文日宣朗文王系卦辭吉凶指諸掌  
周孔更發明此道該穹壤濂溪論理微康節推數廣  
程朱述傳義明白非惚恍半夜一聲雷千門忽然敞  
月窟與天根乘風恣來往焚香誦韋編悠然動遐想

詩集

卷之十一

十一

清明感興

宦遊無定踪飄飄任南北今年在并州邂逅過寒食  
花枝紅欲燃草色翠如織羣鳥鳴閒庭喧啾竟朝夕  
飛絮隨東風輕盈粘几席而我與春光相看俱是客  
春歸已有期我歸應未得對景不成歡喟然長太息  
太息復何爲揮毫題素壁

入春狂風大作加以久無雨雪因以自咎

朔風怒號不得止漠漠埃塵漲天起入春已是一旬

餘翻覺貂裘薄如紙前朝飛雪天上來間積郊原不  
盈指壠間宿麥正青青無雨安能勃然起  聖皇憂  
民如赤子  詔旨丁寧在人耳輕徭薄賦更恤刑天  
意云何乃如此撫循失政固予罪竊祿偷安心獨愧  
願移災咎及余躬免使蒼生受憔悴

暇日命僕於盆池養魚瓦缶種穀以觀生意

盆池養魚缶種穀魚自悠然穀還綠缶中生意亦流  
通盆池江湖非局促乾坤二氣本無私高下洪纖均  
化育放魚入海化爲龍移穀在地收萬鍾龍飛九天  
詩集  卷之十一  十三

雨萬國穀布下土蘇羣農乃知此物有神化世間大  
小無不容

晝夜長短

晝夜分長短氣候互涼燠晝長宐官府夜短省鐙燭  
鐙燭民膏脂燃之非我欲無奈更漏長欲眠還反復  
起坐向燈前中心如轉轂或將既往追或將未來續  
兵民當懷綏邊境宐儲蓄化何由而行政何由而肅  
思之有未得還將舊書讀職分所當爲一一在心目  
夜分方就枕展轉猶未足奴隸不得眠偶語向廚屋



爲此非好勞庶以償俸祿自從春晝長百事免拘束  
冠蓋臨高堂咨詢盡民俗貧者爲寬征饑者爲發粟  
善良加撫摩豪強使懾服閭里無橫科倉廩有餘穀  
簡教厲兵戎公勤披案牘訴牒旁午來剖斷不留宿  
雖非霹靂手遇事頗神速退食時從容吟詩對脩竹  
夜後卽安眠何須論榮辱民財免耗傷奴隸無怨讟  
此事良自知誰能喻衷曲

慈訓堂詩

有序

母坤道也以養育爲德而主乎慈故爲母者未始

詩集

卷之十一

十四

不慈其子慈而能訓者蓋少訓而能底于成者尤  
不多見也四明王原之母夫人舜江張天民先生  
女也予髫年時識先生高古脩潔與人不苟合長  
於詩尤工於楷法雖尋常製作若不經意思而人  
自以爲不可及蓋天資俊邁問學克裕使然也觀  
先生則夫人之賢可知矣夫人蚤適原之父金溪  
令中歲孀居守節厲志篤於訓誨諄諄然勉諸子  
以力學而諸子克遵厥訓底于有成旣而原之以  
校官起家超拜監察御史擢叅山西藩政清慎明

決卓然有稱季復登進士第授秋官尙書郎餘雖  
未仕亦皆脩謹力學爲鄉里聞人是皆平日訓誨  
所致原之推本所自而扁其堂曰慈訓所以表夫  
人之懿行而示若子若孫於無窮也大宗伯兼翰  
林學士楊先生與詞林諸耆舊皆爲文以識之矣  
間嘗徵余言余嘉夫人之善於教子而原之昆季  
又能不負其所教世之爲母子者將於是而取則  
焉斯堂之作豈直爲觀美哉因爲詩以歌之

君不見孟軻稱大賢道學冠今古陶侃惜分陰乃心

詩集

卷之十一

十五

忠典午當年造就賴慈親剪髮斷機良獨苦君家阿  
母貞且賢與古列女相比肩孀居節操凜冰雪諸孤  
在膝皆髫年諄諄訓誨不輟口願汝成立報所天爲  
言汝家素閱閱累葉簪組相蟬聯而翁受 命宰百  
里奉法循理人共傳一朝奄棄遺余輩我故未忍歸  
重泉屬纊言猶在吾耳令我慙慙教諸子汝曹力學  
能有成余父雖歿猶不歿言之痛心恐未足大書日  
新扁華屋諸郎感奮思立身恒若湯盤警心目明師  
益友資討論暮史朝經勤講讀一朝昆季俱登庸萬



里雲霄快鴻鵠伯也繡衣霄漢立季也芳名題桂籍  
子能若此親何憂笑引諸孫餉梨栗滿庭慈竹布清  
陰繞砌萱花麗遲日

憫農

無雨農怨咨有雨農辛苦農夫出門荷犁鉏村婦看  
家事縫補可憐小女年十餘赤脚蓬頭衣藍縷提筐  
朝出暮始歸青菜挑來半沾土茅簷風急火難吹旋  
燕山柴帶根煮夜歸夫婦聊克饑食罷相看淚如雨  
淚如雨將奈何有口難論辛苦多嗟爾縣官當撫摩

詩集

卷之十一

十六

收麥詩

大麥收割蚤二麥收割遲帶青摘穗不候熟老稚藉  
此聊克饑去年夏旱秋又水穀麥無收民受餒今年  
種麥十二三縱有收成無積累了却官租餘幾何女  
嫁男婚債負多公私用度皆仰給可喜時清無重科  
有司牧民當體此愛養蒼生如赤子庶令祿位保始  
終更有清名播青史剝民肥已天地知 國法昭昭  
不介私琴堂公暇垂簾坐請誦老夫收麥詩

喜雨行

夏田得雨苗青青秋田得雨容易畊夏田秋田俱得  
雨農家不用愁收成收成有望人心悅四方萬國騰  
聲嗟予非才忝巡撫慙無德澤被蒼生但願風調  
雨順民安業我亦走馬看花歸 帝京

夏夜步月

明月入我戶清風吹我衣散步下瑤階仰看星斗輝  
萬籟寂不聞羣動咸息機嘯歌振林藪鳥雀爭分飛  
興盡卻歸來此意知者稀

酒凍戲題

詩集

卷之十一

十七

我有一罇酒欲酌誰與共置之向牀頭僮僕不敢動  
歲暮天苦寒忽然結成凍開罇撫掌笑有物必有用  
更添麩蘖作酸醯飽茹黃虀三百甕

無題

人生不滿百常爲千歲計圖利與求名昂昂爭意氣  
晝營夜復思顧恐力弗至一旦壽命終萬事皆委棄  
卓哉陶靖節不爲世故累解印歸柴桑清風滿天地  
樽中幸有酒自酌還自醉借問寰中人誰能會此意

自嘆



人生四十餘已作十年客百歲能幾何少壯難再得  
今朝太行南明日太行北風雪弊貂裘塵沙暗金勒  
寒暑互侵凌凋我好顏色齒牙漸搖脫鬚髮日以白  
位重才不克况此遲暮迫爲上之勲勞爲下無德  
澤揣分空退休非惟慕奇特蚤賦歸去來庶免清議  
責

夜聞雀喚有感

齋居無四隣庭空篆煙冷明月揚素輝脩篁散疎影  
雙鶴向我鳴鼓翅復引領靈風振縞衣華露浥丹頂  
清響徹雲霄萬籟悉以屏芝田在何許遥遥隔塵境  
欲去還未能蹉跎駐光景聽此融心神令人發深省

梅花圖爲嚴憲副題

我家住在西湖曲種得梅花遶茅屋雪消風暖花正  
開千樹瓏璵綴香玉有時抱琴花下彈有時展易花  
前讀浩然清氣滿乾坤坐覺心胸絕塵俗一從游宦  
來京師幾度梅花入夢思爲君展卷題詩處還侶  
開窻對月時醉墨淋漓染毫素筆底生春若神助調  
羹鼎鼐愧無功何時卻踏西湖路

無題

朝在太行南暮在太行北問余何事苦恩恩鞍馬驅  
馳常是客笑而不答心自知眷戀浮名好是痴昨日  
朱顏如殢酒今朝白髮已成絲遠離鄉國空勞夢悵  
望庭闈有所思君寵親恩俱未報竊祿無功補  
盛時太行山不可攀誰似山頭白雲好纔成霖雨便  
知還

雨後寫懷

甘雨洗塵寰爽氣滌煩襟參差庭前樹蓊蔚敷繁陰  
詩集 卷之十一 十九  
凱風泠然來好鳥送佳音俯瞰池塘水粼粼清且深  
中有雙鯉魚隨波恣浮沉視茲節物佳擊節動謳吟  
萬事毋足論大化契我心

池邊散步

臨流樹影半欹斜晴波滉漾走金蛇簾前燕子掠飛  
蝶池面魚兒吹柳花遊絲牽風白日靜落紅滿地青  
春賒數聲啼鳥助幽興門巷彷彿山人家

無題

名節重泰山利欲輕鴻毛所以古志士終身甘緼袍



胡椒八百斛千載遺腥臊一錢付江水死後有餘裒  
苟圖身富貴剝民脂膏 國法縱未及公論安所  
逃作詩寄深意感慨心忉忉

篝燈夜窻下撫卷坐來久泛觀古豪傑際遇良不偶  
伊周及房杜股肱戴元首韓范與富歐麴蘖成醴酒  
勲業正當時功名垂弗朽李廣命不侯馮唐空白首  
間關逐常調遇事亦掣肘賦命有疾徐奔競適足醜  
掩書對明月且盡杯中酒

寄內

詩集

卷之十一

二十

結髮爲夫妻恩愛兩相好生男與育女所期在偕老  
我生叨 國恩顯宦亦何早班資忝亞卿巡撫歷邊  
徼自愧才力薄無功答 穹昊勉力效驅馳庶以贖  
天討汝居輦轂下閨門日幽悄大兒在故鄉地遠音  
信杳二女正嬌癡但索梨與棗况復家清貧生計日  
草草汝惟內助勤何曾事溫飽而我非不知報主事  
非小忠孝世所珍賢良國之寶尺書致慇懃此意諒  
能表歲寒松柏心彼此永相保

憶老婢

吾家有老婢行年近五十雖云極醜陋所幸少過失  
我昔少年時垂髻髮如漆銳意取功名辛苦事紙筆  
雙親命老婢給使讀書室余時方氣剛未知撫愛術  
斯須不如意罵詈信口出老婢受不辭未始怨且泣  
我壯忝科名旋登顯要職老婢亦欣慰且言所願畢  
家人自南來致意我家室此意久未報吾心恒鬱鬱  
作詩寄所懷相見應有日

題畫二首

江村昨夜西風起木葉蕭蕭墮江水水邊蘋蓼正開

詩集

卷之十一

二十一

花粧點秋容畫圖裏小舟一葉弄滄浪釣得鱸魚酒  
正香醉後狂歌驚宿雁蘆花兩岸月蒼蒼

同雲蔽天風怒號飛來雪片如鵝毛須臾羣峯失翠  
色等閒平地生銀濤探梅詩客多清趣瘦蹇衝寒溪  
上去只聞風送暗香來不識梅花在何處

日暮絳州道中

行行度山岡望望指城廓雲收雨意散天晚日色薄  
萬籟鳴笙竽清風滿巖壑雖云途路遠此景殊不惡

題壁間畫



看山如看畫聽水如聽琴水流碧溪轉山高白雲深  
俯仰天地間萬物本無心松風颯然來爲我滌煩襟  
寒夜煮茶歌

老夫不得寐無奈更漏長霜痕月影與雪色爲我庭  
戶增輝光直廬數椽少隣竝苦空寂寞如僧房蕭條  
厨傳無長物地爐熱火烹茶湯初如清波露蟹眼次  
若輕車轉羊腸須臾騰波鼓浪不可遏展開雀舌浮  
甘香一甌啜罷塵慮淨頓覺唇吻皆清涼胸中雖無  
文字五千卷新詩亦足追晚唐玉川子貧更狂書生  
詩集

卷之十一

二十一

本無富貴相得意何必誇膏梁

五言絕句

惜春

無計畱春住從教去復來明年花更好只是老相催

春曉

晝靜煖風微簾垂客到稀畫樑雙燕子不敢傷人飛

落花

春來又春去花落復花開老少尋常事何須廢酒杯

暮春

槐柳拂雲長清陰覆短墻羣芳俱落盡祇有菜花黃  
小樓卽景

樓外青山好樓前綠樹多闌杆知幾曲曲曲費吟哦

偶題三首

日落風欲靜鳥啼人自閑白雲如解事成雨便歸山

其二

倦鳥投林處斜陽在樹枝薄雲收未盡山雨作晴時

其三

薰風何處來吹我庭前樹啼鳥愛繁陰飛來不飛去

詩集

卷之十一

二十三

夏景

簾捲薰風動庭空白日長可憐雙蛺蝶猶戀菜花黃

喜雨

雨洗乾坤淨恩沾品物新俯觀寰海內無復皺眉人

日暮

歸鴉爭遶樹落日半啣山微雨晚來歇孤雲獨自還

秋意

池上秋風起池中秋水涼芙蓉好顏色可惜不禁霜

春夜



長風送華月照我庭前樹宿鳥忽驚飛雙雙背人去  
清明日戲題

纔看花滿枝又見花零落春光不自流莫怪東風惡

夏日晚景

浮雲合雨意斜日弄波光暮景難畱戀誰言白晝長

紀夢中作

判袂不辭難出門山更山來年二三月竚聽凱歌還  
夏日散步庭下偶題

雨過苔痕淨庭空日影遲好懷誰會得啼鳥在花枝

詩集

卷之十一

二十四

清源分司林檎去時始見開花自平陽還則結  
實久矣因成二十字

去時樹開花來時花結子如何馬上人來往只如此  
舟中

遠道疲鞍馬舟行得暫閑推蓬看風景祇見太行山  
題金壁山水二首

溪山踈雨歇水木散清陰樵唱知何處白雲深更深  
其二

花發東風軟鳥啼春晝閑抱琴出門去隨意看青山

送趙叅議之浙江

楓宸初拜命浙江已馳名到任君應喜西湖徹底清

并州北門城樓

塞北窮冬候無風也自寒樓高窺朔漠無事莫憑闌

凍鵲

獨占高枝立天寒伴侶稀明朝春意動好向上林飛

獨坐

焚香坐一室馳心向萬里有官脩其職展轉安得已

見新月感懷

詩集

卷之十一

三五

新月似銀鈎彎彎掛客愁相思萬里外薄暮倚層樓

和高僉憲雜詠

手捫水中月誤觸清虛殿竊藥歸掌中祗恐姮娥見

暮景

怪底東風惡寒威透客衣捲簾雲接地撩亂雪花飛

春寒

遠山猶帶雪淺水未生波花柳無消息春寒可奈何

除夜宿太原寒甚

寄語天涯客輕寒底用愁春風來不遠只在屋東頭



春日客懷二首

馬上春如夢空嗟歲月長  
天涯無限路芳草自斜陽  
其二

莫把層樓倚樓高接遠天  
東風鄉國路直在白雲邊  
春日登樓

桺條如翠線萬縷織春愁  
遮斷東風路無緣入畫樓  
春思

春色二分過花枝一半開  
天涯芳草遍游子幾時回  
膽瓶梅

詩集

卷之十一

二十六

數點枝頭雪分明露化工  
恐教塵土浣移入玉壺中  
秋意

溽暑隨風散微涼趁雨生  
蕭蕭樹頭葉已解作秋聲  
五言律詩

春寒病中自慰

別離驚歲換老病怯春寒  
脫幘擁衾臥移書就枕看  
暗將歸計卜聊把客懷寬  
早晚金臺路東風拂繡鞍  
冬至日思親

客裏逢佳節天涯憶老親  
葭灰初應候梅蕊漸回春

醉訝朱顏好愁添白髮新孤雲恒在望翹首欲沾巾  
鄭州遇學正沈平之

一從分袂後兩地各悵然道路千山隔音書幾度傳  
相逢成感慨欲別更畱連清話休辭久重來又隔年

喜雪

凍迷鴛瓦冷花簇鳳城春和氣成三白歡聲洽萬人  
樓臺失遠近草木動精神豐稔何須卜堯年瑞應頻  
八月四日夜月

誰將白玉鈎掛向柳梢頭鏡缺姮娥恨眉顰越女羞

詩集

卷之十一

二十七

生光從此夜滿鳧待中秋但願團圓夕相看入鳳樓

穀日喜晴

穀日晴明好豐年信可期雪消風澹澹天煖日遲遲  
東作因時起西城與歲空憂民無限意對此暫舒眉

因觀王金陵效白樂天何處難忘酒之作喜其  
切近人情乃亦效顰非敢追踪前人不過遣

興而已二首

何處難忘酒隆冬客異鄉門前風凜凜天外雪茫茫  
候館人煙少前途道路長此時無一盞安得解愁腸



其二

何處難忘酒承恩晝錦榮賓朋相慰藉兒女共攀迎  
白髮庭闈健青春事業成此時無一盞安得敘歡情  
絳州分司謾興

高居遠塵世嘉木結繁陰葉密藏山果池清立水禽  
簾垂花隔戶石迸笋穿林鎮日看書坐翛然解俗襟  
暑月將自太原巡汴

三晉衝寒到中州冒暑回山川元不改節候自相催  
綠樹連天暗紅葵向日開太行雲縹緲搔首意徘徊

詩集

卷之十一

二十八

回朝偶題

老去驚時換公餘覺晝長池風荷偃翠林雨杏垂黃  
舊業存書卷閑情付藥方偶來北窻下高枕夢羲皇  
望雨無寐曉起偶題

聞雞推枕起曙色漸分明樹暎旌旗影風傳鼓角聲  
雲霓常在望天地豈無情坐待甘霖降羣黎各遂生  
次日陰雲密布不雨復散

潑墨濃雲布漫空雨意懸斯須露紅日依舊靚青天  
祈禱知何益焦枯亦可憐非才膺重寄值此更悽然

太行途中雜詠

碗子城邊路年來幾度過  
山川認行色花鳥熟鳴珂  
戀闕情何恨瞻雲思轉多  
壯懷成激烈彈劔欲高歌  
到澤州

信馬天將暮離山路轉平川  
縈太行驛樹繞澤州城  
落日翻旗影長風送鼓聲  
孤雲在天際回首若爲情  
題古寺

古寺知何代荒涼倚翠微  
凝塵生佛面落葉擁禪扉  
殿迥香鐙寂廊空鳥鵲飛  
塔鈴風外語應似怨斜暉  
詩集

卷之十一

三九

聞朝覲官有喜且以致勉勵之意於屬吏  
云

聖主當天運諸侯述職歸  
珮聲辭禁闕香靄散朝衣  
戒勅頒天語生成顯化機  
勉旃圖報稱莫使寸心違

春日卽事

案牘閒清晝歌謠遍里閭  
光風回細柳甘雨洗嘉蔬  
遣興杯中物消愁几上書  
所期民物昇此外復何如

遊春



滿路香塵起尋春思欲迷樹晴鶯出谷溪暖燕啣泥  
玉勒嘶芳草青樓瞰大堤風光無限好都在畫橋西  
春愁

謾說韶光好關心別有愁雨慳禾未種土渴麥難抽  
吏牘勤披檢民風肆訪求尋芳遊冶子爭識廟堂憂  
連日大風至十八日午後乃止喜賦

狂風當午歇庭戶絕纖塵落蕊粘芳草遊絲挽暮春  
間關鶯語滑來往燕飛頻縱是韶光晚相看亦何人  
日晚至文水

詩集

卷之十一

三十

溪明寒日落樹暝夕煙生飛鳥隨人語長風擾樹聲  
鼓笳悲遠戍車馬厭脩程騎火前村起山城候吏迎  
春日大風感懷

遠塞足風沙春深不見花層冰猶度馬弱柳未藏鴉  
易醉愁邊酒頻歸夢裏家凭闌一搔首心緒亂如麻  
送吳繡衣還朝

觀風俱是客君去我何時暮景春三月離情酒一卮  
遠歸真可喜漫醉不須辭珍重同年誼應勞別後思

春日客中謾興

客懷雖寂寞春意自堪憐  
草色翠如織花枝紅欲燃  
鳴鳩踈雨後啼鳩暖風前  
翹首天涯路韶光又一年  
山行

望極羣峰遠行穿一徑幽  
雲從樹杪起水遶竹根流  
酒旆搖村舍鐘聲出寺樓  
多情林外鳥巧語答鳴騶  
客途春陰

薄雲和日色底事弄陰晴  
駐馬空回首鳴鳩不住聲  
東風吹野草暮靄起山城  
擾擾長途倦逢人卽問程  
喜雨二首

詩集

卷之十一

三十一

和氣成甘雨沾濡意轉深  
一犁通地脈萬物識天心  
花柳滋春意山川起夕陰  
農夫咸喜悅點滴直千金  
其二

花外錦鳩啼催來雨一犁  
眼前生意足頭上暖雲低  
紅透花枝重青涵草色齊  
明朝出城郭走馬踏春泥  
秋晚山行

日落千山暝風高萬木凋  
深溝通曲徑獨木架危橋  
客路空迢遞離情轉寂寥  
驛樓看漸近時聽馬蕭蕭

秋暮汴中述懷



汴城秋節暮候館客愁新  
京國馳情久家山入夢  
頻塞鴻愁月夜籬菊慘霜晨  
借問歸何日浮名絆此  
身

喜晴

久雨晴偏好羣芳各鬪妍  
柳濃鶯恰恰花暖蝶翩翩  
風景逾三月韶光直萬錢  
尋春無限意緩著紫絲鞭  
暮春後歸興

雨洗乾坤淨羣峰露翠微  
水清魚自見花謝蝶還稀  
寥落驚春暮蹉跎與願違  
耳邊山鳥語勸我不如歸  
詩集

太行山中曉行

月落日未出東方隱又明  
雲連懷慶郡霧繞澤州城  
道路淹歸計關河動客情  
故鄉不可見搔首望神  
京

自嘆

白髮太無情年來次第生  
官清存晚節才薄負虛名  
秋雨黃河水春風碗子城  
巡行知幾度候吏厭逢迎  
偶得

地僻塵囂遠公餘興未清  
過門無俗轍閉戶有書聲

賓從皆時彥謀謨盡物情  
菲才叨重寄何以答昇平  
漫題屋壁

卜得幽居好秋來景倍佳  
堂虛先得月城近每聞笳  
雨洗蒼梧葉風吹白藕花  
門前無列戟錯認野人家  
秋日卽事

風靜林塘好波光一鑑開  
金魚穿綠藻翠竹映蒼苔  
幽草鋤還長馴禽去復來  
時清公事簡冠蓋日徘徊  
喜雨

日入千山黑層雲搆夕陰  
一聲雷送雨萬國土成金  
詩集

卷之十一

三十三

品物回生意閭閻誦好音  
天公應有在知我愛民心  
雨後散步

小園踈雨歇散步快幽情  
行處蒼苔滑吟邊綠草生  
薄雲還掩映初月未分明  
撫景聊成趣塵煩喜暫清  
延津縣

縣治蕭條甚疲民疫病多  
可憐官失職况是歲傷和  
空廩全無積荒田更起科  
撫安才智短獨立奈愁何  
荒村

村落甚荒涼年年苦旱蝗  
老翁傭納債稚子賣輸糧



壁破風生屋梁頽月墮牀那知官府內不肯報災傷  
寒垣紀興

寒雲迷古塞積雪照平川境外風塵靜樓頭鼓角傳  
廟堂勤遠略節鉞鎮窮邊巡撫應多暇乘驄裊玉鞭  
秋日述懷

塞垣霜信早北雁往南飛水冷蓮房老林疎木葉稀  
有官居鼎鼐無處覓庭闈何限關心事臨風一歎欷  
除夕

今宵是除夕明日又新年爆竹驚殘夢寒鐙照獨眠  
詩集

卷之十一

三十四

風霜催臘盡梅柳得春先撫景情無限那能不悵然  
送御史莫資本還南京

碧雲開霽色黃葉作秋聲仗節還烏府承恩出鳳  
城宦途期遠大憲度喜澄清濁酒不堪飲題詩慰別  
情

七言律詩

賦得玉泉垂虹

巨靈劈石迸流泉萬丈虹霓著地懸怒捲風雷趨瀚  
海細分脈絡貫長川千巖濺沫雲應濕一鑑澄空月

正圓寶瓮誰能釀春酒稱觴獻壽祝堯年

賦得瓊島春雲

玉壘金城七寶臺  
綢繡佳氣自天開  
長依瑞日迎車輦  
每逐仁風被草萊  
輕帶春陰花外度  
清隨曙色柝邊回  
廣寒宮殿承恩處  
曾覩龍文接上台

初冬客途感懷

小雨溟溟不濕衣  
饑鶯高貼野雲飛  
南來北往河山迥  
秋盡冬初草木稀  
半夜還家歸夢好  
十年爲宦客情微  
故園茅屋收成後  
啄黍黃雞想正肥

詩集

卷之十一

三五

和余吾驛壁間詩

煌煌使節下并州  
俯仰乾坤豁遠眸  
萬里關河迂馬足  
十年風雪弊貂裘  
北連河朔風塵靜  
東望都門瑞氣浮  
車騎紛紛催曉發  
一聲雞唱五更頭

初度

碌碌庸庸四十餘  
因逢初度轉躊躇  
腰黃久負金爲帶  
頭白驚看雪滿梳  
剝喜門庭無賀客  
絕勝廚傳有懸魚  
清風一枕南窗臥  
閒閣牀頭幾卷書

與顧趙范三繡衣晚酌醉後偶題



臨風長嘯岸烏紗賓主相忘醉眼花千里逢人俱是  
客十年持節未還家欲將海水添盃量卻笑秋霜入  
鬢華酒醒更闌成獨寐夢魂依舊繞天涯

自嘆

鬢花斑白帶圍寬竊綠無功久曠官岸幘恥爲寒士  
語調羹不用腐儒酸逢人只說還家好垂老方知濟  
世難戀戀西湖舊風月六橋三塔夢中看

客中感懷

十年蹤跡厭紅塵功業無成白髮新夢裏不知身是  
客覺來惟有影相親夕陽衰草梁園暮細雨閒花沁  
水春馬足經行今幾度溪山應笑未歸人

還京述懷

睂間黃色應歸期正值清秋八月時封事預需當寧  
問音書先慰倚門思宦情落落從來懶吏牘紛紛欲  
去遲好在故園三畝宅功成身退是男兒

秋夜歸興

華月行空流素光星辰隱隱動寒芒煙銷寶篆金鑪  
冷水咽銅壺玉漏長望斷鄉書無過鴈牽成離恨有

啼螿弊廬只在吳江上  
蓴菜鱸魚入夢香

春日客懷

年年馬上見春風  
花落花開醉夢中  
短髮經梳千縷白  
衰顏借酒一時紅  
離家自是尋常事  
報國慚無尺寸功  
蕭澁行囊君莫笑  
獨畱長劍倚青空

登樓書興

公暇登樓立彩旛  
客懷撫景倍凄然  
千家綠樹蒼煙外  
數點青山落照邊  
暮景侵尋欺病骨  
秋霜容易上華顛  
自知不是經綸手  
附郭須營二頃田

詩集

卷之十一

三十七

除夕夜坐感懷

秉燭焚香坐不眠  
夜長難到五更天  
懷人此際隔千里  
爲客明朝是十年  
遠道風霜嗟老矣  
故園梅柳想依然  
椒盤獻歲知誰共  
獨把金杯對影傳

送吳繡衣還朝

平明走馬入京畿  
楊柳飛花點繡衣  
山外有山頻入望  
客中送客轉思歸  
紅雲高拱天門邃  
綠樹深藏驛路微  
渡却黃河知已少  
臨岐盃酒莫相違

過中牟魯恭祠



長民曾羨魯恭賢，民物熙然各遂天。境外遺蝗徒擾擾，桑間馴雉自翩翩。閭閻風俗猶前日，史傳聲華紀昔年。寄語郎官勤撫字，循良衣鉢要人傳。

聞甘州等處捷報有喜

露布星馳上玉京，三邊寇虜一時平。人間玉石銘勲業，天上銀河洗甲兵。罷虎有勞咸進秩，犬羊無計可偷生。從今海宇風塵靜，廟算應知出聖明。

嘆賈平章廢宅

豪華汨沒幾星霜，廢宅空遺孔道傍。鼠迹印塵盈故榻，燕巢經雨落空梁。紫雲歌斷人千古，金谷花殘夢一場。世事興衰總如此，啼鴉不必怨斜陽。

過五嶺山

五嶺山下路盤旋，曲昇崇岡遠接連。十里郵亭數椽屋，幾家村落一坵田。林梢日沒僧歸寺，澗底冰消鹿飲泉。詩思多從鞍馬得，驂騑不用苦加鞭。

盤陀驛道中

羣峰盡處是盤陀，小徑紆回亂石多。風約閒雲難作雨，渠分流水不成河。門開野店羣雞唱，花發春山百

鳥歌一段好懷無著處令人對景費吟哦

遣懷

纔離汴水又并州馬上光陰易白頭出處每懷心耿耿是非誰較論悠悠貂裘不長三冬雪燕領終封萬里侯珍重晚來風景好黃花老圃殿高秋

春風

蕩漾無端入畫堂簾櫳微動晝初長暖催花底鶯聲滑輕拂簷前燕翅忙酒醒香塵凝座榻夢回芳草滿池塘飄揚不解畱春住又逐鞦韆度粉墻

詩集

卷之十一

三九

憶晉祠風景且以致望雨之意

懸甕山前境趣幽邑人云是小瀛洲羣峰環聳青螺髻合澗中分碧玉流出洞神龍和霧起凌波仙女弄珠游願將一掬靈祠水散作甘霖遍九州

夜宿山館書懷

蕭然山館似僧房三尺寒檠一炷香風捲松濤清入夢窻涵月色冷侵牀倦來不覺良宵短明發從教去路長但願兩藩民物昇不知何處是他鄉

薇垣春曉爲山西王大參賦



漏渴銅龍報曉衙月鈎猶在紫薇花分藩任重數千里化筆春回百萬家香燕雕盤籠睡鳴鐙輝青瑣散棲鴉相看且氣清如水坐待金烏出海霞

春水

東風鼓浪散輕冰萬頃玻璃一望平白鳥下來分細穀錦鱗驚躍破浮萍臨流畫閣圖中見載酒樓船鏡裏行安得天瓢都挽取化爲甘雨潤蒼生

憶瑠英

瑠英一別已三年夢裏常看在膝前婉婉性情端可

詩集

卷之十一

四

凌嬌癡態度亦堪憐誦詩未解知音節索果惟應破俸錢白髮雙親在堂上關心爲尔更凄然

連日燈花鵲噪漫成

夜看銀臺吐絳花曉聞靈鵲噪簷牙民安足遂中心願年壯何妨到處家得失紛紛隨夢蝶公私擾擾付鳴蛙晚香好在東籬菊相伴秋霜入鬢華

雪霽之夕聞簷溜有聲因賦

人皆愁聽客中雨我獨喜聞窗外聲報國常懷豐

稔念關心不是別離清沾濡最愛滋羣品點滴何妨

到五更倏起披衣成兀坐焚香讀易候天明

閱武

聖主當天致太平守臣閱武向邊城一川花弄旌旗影八面風傳鼓角聲羽鏃穿雲誇電疾戈矛映日鬪霜明三軍銳氣能如此會縛戎王獻 玉京

嗽疾達旦不寐

寒疾攻人寐不成惺惺欹枕候天明十朝九病非無藥一刻千金浪得名戀 闕心馳京國路思親腸斷武林城男兒此外無他事莫笑浮名絆此生

詩集

卷之十一

四十一

詠煤炭

鑿開混沌得烏金藏蓄陽和意最深燭火燃回春浩浩洪鑪照破夜沉沉鼎彝元賴生成力鐵石猶存灰後心但願蒼生俱飽暖不辭辛苦出山林

天門山

天門山峙近西偏屹立芙蓉翠插天六月岡巒飛雨雪四時草木吐雲煙鳥飛不過巖頭石人渴難尋澗底泉安得六丁施斧鑿沿沿車馬信平川

觀書



書卷多情似故人，晨昏憂樂每相親。  
眼前直下三千字，胸次全無一點塵。  
活水源流隨處滿，東風花柳逐時新。  
金鞍玉勒尋芳客，未信吾廬別有春。

落花

半隨流水半隨塵，斷送韶光惱殺人。  
蜂蝶有情悲寂寞，園林無處覓精神。  
眼前紅雨飄零盡，階下蒼苔點綴新。  
分付家童莫輕掃，醉眠還勝錦爲茵。

飛絮

飄飄隨意點輕裘，播蕩東風不自由。  
亂逐紅塵迷客路，輕隨綵燕入歌樓。  
梁園飛雪驚春夢，渭水斜陽送客愁。  
莫向樽前苦惆悵，綠陰還在粉牆頭。

交城道中

峰巒重疊樹微茫，回首清源道路長。  
僧屋數椽臨野水，人家一半住山鄉。  
龍歸洞口雲煙濕，麝過林間草木香。  
隨處停驂問民俗，不知歸鳥背斜陽。

孝義縣懷古

茫茫煙樹繞孤城，千載猶傳孝義名。  
郭巨墓荒春草合，比干臺古野煙生。  
落花飛絮迷征旆，剝水殘山惱

客情鞍馬恩恩無限量不堪回首暮雲平

過韓信塚

躡足危機肇子房將軍不解避鋒鏑成功自合歸真  
主守土何須乞假王漢祖規模應豁達蒯生籌策豈  
忠良荒墳埋骨山腰路駐馬令人一嘆傷

過皋陶廟

明刑弼教佐雍熙千載嘉謨仰士師故里淒涼遺舊  
塚穹碑剝落倚荒祠虞廷法立人無犯後世民生儻  
益滋廟貌幸存神未泯賡歌猶得想當時

詩集

卷之十一

四十三

過夏縣輓司馬文正公

破甕機鋒豈偶然活人手段自髫年閭閻稚子知司  
馬海宇羣黎仰涑川出處遂關時治亂歿生難免世  
推遷蒼松逕柏環祠墓凜凜清風在目前

平陽分司

槐柳如雲覆院牆清和天氣日初長雨餘堦砌苔應  
滑花落池塘水自香謝客只容風入戶捲簾閒放燕  
歸梁吏民清肅文書簡吟對羣峰坐畫堂

觀登科錄感興



聖主垂衣御九重羣賢彙進萬方同文明啓運天垂  
象豪傑乘時氣吐虹柳汁染衣新樣綠花枝映面醉  
顏紅當年我亦曾遭際塗抹于今避下風

初度日

年年馬上度生辰老景偏攻客裏身白髮無能酬  
聖主青宵有夢覲雙親仙家漫說延齡術塵世應無  
不成人脩短榮枯天賦予一官隨分樂清貧

王大叅以春景諸作見遺賦此以答

烏府聯鑣憶舊游新詩慰我客邊愁胸中生意由天  
造筆底行雲似水流青喚喜聞空外雀浮名笑破水  
中漚何時共遂歸田計千里郵筒迭唱酬

初度自責

每逢初度益凄然却訝增年是減年濟世愧無書滿  
腹投閒何待雪盈顛關山迢遞歸路歲月淹雷費  
俸錢任重才疎成底事西湖豈乏釣魚船

望雨

赤日行空暑氣浮炎風簸土幾時休雲霓久渴斯民  
望廊廟當分聖主憂早魃勦除消沴氣神龍鼓

舞起靈湫挽將天上銀河水散作甘霖潤九州

晉祠禱雨曉行

曉行數里未天明路繞汾河聽水聲斜月帶星橫遠  
漢清風傳漏報殘更中心但願靈祗格遠道何須父  
老迎好挽銀潢作甘雨溥沾率土潤蒼生

夜四鼓城隍廟合祭羣神

銀燭金鑪布廟廷光輝照夜奪繁星共祈霖雨蘇羣  
品普願天符命六丁造化無私應洞鑒鬼神有耳亦  
同聽虛空陡覺濃雲布更喜飈輪卽漸停

詩集

卷之十一

四十五

夏日公餘

三邊無警靜烽煙客散轅門思悄然池面雨晴荷蓋  
小庭中日午樹陰圓清心閉戶看周易解慍臨風鼓  
舜絃菲薄將何稱獻納兩藩旌節謾畱連

庭前葵花盛開詩以賞之

庭院深沉白日長羣芳無處避炎光獨將翠葉成朝  
露自吐丹心向太陽夜短不愁花睡去春歸何用蝶  
飛忙關情相對薰風裏賸把新詩詠錦囊

并州五月中旬雨未霑足而風氣蕭然與清秋



無異感而賦此

客懷搖落向并州五月蕭然似九秋  
午榻清風閒白羽夜窻寒夢怯黃  
紬樹陰慘地雲遮日嵐氣飛簷雨  
入樓離思宦情千萬種都隨景物到  
心頭

祈雨蔬食

首肯盤中意味長經旬不近酒盃香  
亦知厚祿慙司馬且守清齋學太常  
客底情懷空抑鬱冥中感應豈微茫  
黃齏百甕皆前定助我平生鐵石腸

新城請水祈雨有應

詩集

卷之十一

四十六

椒香百里扣龍祠乞得靈泉浸柳枝  
酌水獻花羅父老吹簫擊鼓走童兒  
神風靜默雲生石和氣薰蒸雨應時  
頃刻寰區生意足從知天地本無私

病起登樓

晚來扶病強登樓迢遞山川入遠眸  
紫塞接連沙漠去黃河還繞郡城流  
天涯芳草重重恨風外飛花點點愁  
往事驚心如夢寐幾回翹首望神州

新柳

不禁風力強扶持裊裊樓前舞瘦枝  
遠客臨行應著

眼佳人纔唱却顰眉飛花未覩漫天雪弄影先看拂  
地絲立馬樹邊無限意黃鸝聲在最高枝

過方山

馬蹄歷盡萬重山霄漢相離咫尺間白石清泉堪枕  
漱丹崖翠壁倦躋攀雨餘林外羣芳歇煙暝松頭一  
鶴還迢遞客途無限意強將詩句解愁顏

七夕感興

燭燼香銷夜漏遲人間天上共佳期女牛有約通銀  
漢兒女虛傳送絲絲月色冷侵丹桂影露華涼沁碧

詩集

卷之十一

四七

梧枝客窻孤枕難成寐臥聽誰家玉笛吹

離京

親朋且莫唱離歌垂老其如遠別何白髮漸從愁裏  
長青春半向客中過山寒日落人煙少月冷江空雁  
陣多今夜客窻孤枕上可能無夢到

蠻坡

夜坐

銀臺火冷墜燈花粉蝶霜寒咽鼓笳窻月照來人影  
瘦邊風吹散雁行斜情多轉覺孤懷切老近生憎兩  
鬢華坐久無聊纔就枕却驚夢裏得還家



春書

蕭條候館度芳春  
暗惜韶光過眼新  
草色入簾開白晝  
花陰滿地隔紅塵  
從知處世若大夢  
何用浮名絆此身  
十里湖邊三畝宅  
青山應笑未歸人

漁

隨分生涯一葉舟  
利名不到釣竿頭  
桃香浪暖三春雨  
木落江空萬頃秋  
渭水西風吹鶴髮  
嚴灘孤月照羊裘  
悠悠往事何須問  
酒美魚鮮醉卽休

畊

詩集

卷之十一

四八

清時幸作太平民  
繞屋田園未是貧  
數口生涯資五穀  
一年辛苦在三春  
生憎稚子扶犁懶  
最愛山妻饋餉頻  
衣食不虧租賦給  
幡然何必慕畊莘

曉行

隴隴淡月帶踈星  
喔喔殘雞報五更  
燈火一攢開野店  
鼓笳三疊啟嚴城  
霜凝峻阪鳴騶緩  
燒起踈林宿鳥驚  
風透重裘寒不耐  
郵亭駐節候天明

寓清源

荒城數里半淤沙  
衰柳千株集亂鴉  
道上雙騶迎使

節水邊一犬吠人家重重山色迷行色點點霜華入  
鬢華遙憶江南好風月客窻清夜夢梅花

夜寒不成寐起坐觀書

寒夜迢迢惱獨眠更從燈火理殘編關情鄉國五千  
里屈指光陰四十年縹緲 帝都紅日下依稀親舍  
白雲邊永懷忠孝何能盡默默安能守太玄

夜坐念邊事

蕭然一室如僧舍秉燭焚香坐夜闌却笑酒酣氈帳  
暖誰憐漏永鍤衣寒安知天下無三傑但願軍中有  
詩集

卷之十一

四十九

一韓世事關心成感慨旋移書卷就燈看  
和梅詩二首

雪中一點笑生春韞色含香怕惹塵結實須歸調鼎  
手開花不近冶容人祇緣鍤石心腸勁結得松筠契  
認真東閣吟成詩百首卻驚筆力會通神

一枝邂逅漏先春不著寰中半點塵鍤石心腸賢宰  
輔瓊瑤肌骨謫仙人獨親和靖能知己更倩華光爲  
寫真此外空山誰是伴清風明月共怡神

塞上卽景



日極煙沙草帶霜天寒歲暮景蒼茫  
炕頭熾炭燒黃鼠馬上彎弓射白狼  
上將親平西突厥前軍近斬左  
賢王邊城無事烽塵靜坐聽鳴笳  
送夕陽

喜高僉憲病痊口號戲之

聞君何事病恹恹鎮日焚香不捲簾  
莫怪藥囊嘗處苦還知蔗境老時甜  
一團清氣難隨俗百甕黃齏足  
養廉造化小兒從此遁吉人天相不須占

別四川方伯邢景

十年佐政向中州一旦趨遷  
寵數優全蜀行沾張

詩集

卷之十一

五十

詠化兩河未許寇恂留月明巫峽猿爭嘯  
雨過瞿塘水亂流還惜故人成遠別  
客中無日不登樓

立春日感懷

年去年來白髮新恩馬上又逢春  
關河底事空畱客歲月無情不貸人  
一寸丹心圖報國兩行清淚爲思親  
孤懷激烈難消遣謾把金盤族五辛

詠雪

纔聚還消似可疑天公深意許誰知  
但令海宇均滋潤不使閭閻起怨咨  
裁翦六花如有意幹旋一氣本

無私登高望遠空吟賞誰和陽春白雪詞

立春

擊罷泥牛物候新一鞭分與萬家春未萌草木先回  
潤久屈龍蛇漸覺伸對景謾傾銀甕酒看花遙想玉  
京人東郊明日迎陽去蹀躞驂駟踏軟塵

立春後寒甚二首

朔吹號寒激箭鋒初春凜凜似嚴冬層冰未泮江頭  
水積雪還迷天外峰間對青銅搔白髮却思金屋賜  
黃封關情最是庭前桺翠黛含顰恨幾重

詩集

卷之十一

五十一

坐擁紅鑪尚怯寒邊城况是鍔衣單管中午夜猶傳  
箭馬上通宵不解鞍主將擁麾方得意迂儒撫劔謾  
興嘆東風早解黃河凍春滿乾坤萬姓安

春雪

寒結濃雲布晚空六花撩亂舞東風素娥裁翦無多  
力青帝陶鎔第一功歲暮祥開三白好春回瑞應萬  
方同豐年有兆羣心悅題詠應慙句未工

春日懷京師風景

聞闔風暄瑞靄飄御溝水滿雪全消花迎劔佩趨青



瑣柵拂旌旗映畫橋一派蕭韶仙仗擁千家簾幙酒  
旗搖不堪馬上春如夢悵望蓬萊隔九霄

自嘆

平生糟粕數行書潦倒真成一腐儒天外冥鴻何縹  
緲雪中孤鶴太清癯聰明不及頑如舊少壯無能老  
更迂覽鏡自驚還自嘆又添幾縷白髭鬚

蚤春登樓遣興

千條柳線織春愁不放韶光入畫樓遠塞天低雲漠  
漠長河風靜水悠悠十年客路雙蓬鬢萬里歸心一  
葉舟南北往來成底事此身無恙任沉浮

詩集

卷之十一

五十二

送張御史還京

繡衣東去馬翩翩莫北觀風又一年使節遙瞻銀漢  
表玉封章先達玉階前落花飛絮催行色急管繁  
絃促別筵老我客中頻送客不堪回首五雲邊

水村

茅屋三椽傍淺沙門前蒲柳綠交加鳧鷖竝宿藏荷  
葉蛺蝶雙飛繞菜花甘雨一犁滋穀麥輕煙數里接  
桑麻晚風天際孤帆客艤棹來尋賣酒家

讀脩鍊書偶題

姪女嬰兒只浪傳不知何物是真鉛塵寰底處安金  
鼎弱水無緣度鍊船玉檢謾藏靈寶法紫陽空著悟  
真篇灰生晝夜皆常理饑則加餐困則眠

見白髮偶題

世間白髮最無情纔近中年次第生碌碌俄驚四十  
載蕭蕭初見兩三莖黃花晚節依然好金液還丹豈  
易成貪得由來戒遲暮何須辛苦事功名

夏日卽事

詩集

卷之十一

五三

密密榆槐散綠雲蕭蕭庭館絕纖塵林鷲巧語如畱  
客梁燕低飛不避人歲月無情催暮景江湖何處是  
通津數莖白髮籠紗帽深愧淵明漉酒巾

畱別高僉憲

斯文骨肉最相親况復比隣唱和頻淡薄年來輕世  
味綢繆日久見天真一鞭行色青山暮兩地離情白  
髮新馬上思君重回首落花芳草不勝春

太原道中曉行

星稀月落曉風清猶聽雞聲報五更山勢平吞沙漠



境河流曲繞晉陽城天涯何處尋歸路野景無邊動  
客情車騎縱橫皆故道不須候吏遠逢迎

徐溝道中

麥隴桑畦遠接連依稀村落動炊煙山溪水漫人喧  
渡野寺日高僧尚眠馬足聯翩踈雨後客懷寂寞曉  
風前庭闈縹緲知何處卻望孤雲一悵然

清化鎮道中

琅玕深處翠陰涼綠樹人家水遶墻宿雨潤含畦麥  
秀南風吹送野花香行人指顧青山遠駐馬徘徊白  
詩集

卷之十一

五十四

晝長景物雖同民俗異不勝三嘆憶吾鄉

舟中漫興

一葉扁舟駕順風黃河九曲路西東沙鷗野鷺飛翔  
遠岸草汀花點綴同望斷歸心帆影裏驚回鄉夢櫓  
聲中推篷獨坐無餘事祇有吟哦興不窮

初度日感懷

百事無成兩鬢皤浮生碌碌竟如何開樽慶壽從來  
懶撫景興懷比舊多南極星辰延鶴算西湖煙雨夢  
漁簑門無賀客心如木臥看窻間日影多

夏日行太行山中

信馬行行過太行一川野色共蒼茫雲蒸雨氣千峰  
暗樹帶溪聲五月涼世事無端成蝶夢畏途隨處轉  
羊腸解鞍盤礴星軺驛卻上高樓望故鄉

夏日卽事

槐陰凝綠暗堦堦雨後薰風拂面吹魚躍亂隨新長  
水鳥啼爭占最高枝紗厨冰簟難成夢羽扇綸巾漸  
及時雨闌清夷無別事觀書最喜日遲遲

許昌懷古

詩集

卷之十一

五五

遠樹孤城認許昌偶因風景嘆興亡羣心本未忘劉  
氏九錫何須假魏王滿地煙霏山水晚一陂秋水芰  
荷香重論往事知何在惟有穹碑對夕陽

過招撫岡

在裕州三十里蓋光武起兵處

重嗟炎燼肇中興此地曾經募義兵古廟數椽誰下  
馬崇岡千古尙畱名飄風入樹林鴉散宿雨沾泥野  
草生觸景興懷無限意不堪回首裕州城

余吾道中

荒村古路人煙少零落郵亭屋數椽野渡冰生寒雪



後遙山鳥沒夕陽邊思家悵望頻回首信馬徐行懶  
著鞭歸計不知何日定眼前風景又殘年

再賦嚴憲副梅花

莫笑踈花冒冷開調羹滋味已胚胎數聲笛向風前  
奏一脈春從天上來清白可能陪雪月孤高元不惹  
塵埃暗香真入蛟龍窟絕勝飄零點翠苔

春寒憶家

碧紗窗外北風多鎮日輕寒可奈何歲月無情人自  
老江山如故客重過桃花深院飄紅雨杜若芳洲泛  
綠波謾說故園春景好不堪歸計又蹉跎

詩集

卷之十一

五六

重過天井關回轍廟

天井關前策馬過道傍古廟鬱差峩石留轍跡深如  
許道在人心耿不磨殘雪初消山侶洗暖風纔動鳥  
如歌自緣景物縈懷抱莫怪重來感慨多

長子縣與同年彭繡衣會宿而別悠然懷思

繡衣使者舊同年文采聲華衆所傳出憲遠巡三晉  
地行囊不貯一文錢啣杯彼此俱成醉上馬東西各  
舉鞭明日五攢山下路不堪回首思茫然

登樓感懷

晚來無事漫登樓，曲曲欄干總是愁。  
渺渺鄉關何日到，茫茫天地此生浮。  
太行有路東西去，汾水無情日夜流。  
華髮蒼顏成底事，可能辜負釣魚舟。

陳繡衣席上醉歸口占一律

停盃不飲意如何，更漏沉沉夜半過。  
寶篆隨風香捲霧，金樽映月酒生波。  
休嫌白髮歡娛少，自信青雲義氣多。  
扶醉歸來清興濶，乘槎直欲泛銀河。

聞都御史顧公致政有喜

詩集

卷之十一

五十七

天上歸來兩鬢蒼，故園草木盡輝光。  
功成却喜榮厚身退從，知姓字香林下且消閒。  
歲月喜端猶憶舊冰霜，春風詩酒從容處，重覩羣英會洛陽。

聞蟬聲

密槐高柳覆華堂，滿地薰風白晝長。  
却怪蟬聲驚客思，不容蝶夢到吾鄉。  
清高最喜含朝露，斷續何須怨夕陽。  
蚤晚涼飈天際起，萬山秋色又蒼蒼。

秋晚行山西道中

暮雲收盡雨初晴，馬首關山路幾程。  
落日旌旗迎使



節西風鼓角動邊城溪流清見行人影霜信寒催過  
鴈聲最喜田家生事足村村笑語樂秋成

秋日經太行

茫茫遠樹隔煙霏獵獵西風振客衣山雨未晴嵐氣  
濕溪流欲盡水聲微回車廟古丹青老碗子城荒草  
木稀珍重狄公千載意馬頭重見白雲飛

壁間畫瀟湘八景

煙寺微茫幾杵鐘漁村斜暎夕陽紅平沙落鴈迷殘  
靄遠浦歸帆趁便風山市微嵐孤嶼斷江天欲雪暮  
雲同洞庭月色瀟湘雨想像陰晴似夢中

詩集

卷之十一

五十八

問月

凭闌笑語問姮娥時缺時圓意若何底事生成蟾皎  
潔誰人種得桂婆婆霓裳舊曲曾傳否玉兔靈丹肯  
與麼不信冰輪高幾許清光能得遍山河

秋風

蕭蕭入夜動清商披拂園林草木黃快意掃除天下  
熱可人吹送枕邊涼荻花楓葉愁江渚蓴菜鱸魚憶  
故鄉萬里碧天雲散盡衝開征鴈不成行

秋光

秋水無痕徹底清  
秋山如畫更分明  
鴈鴻影裏雲連塞  
砧杵聲中月滿城  
映日丹楓輝錦樹  
傲霜黃菊綻金英  
不須頻上高樓望  
此景由來惱客情

秋峰

浮雲散盡雨初晴  
天際羣峰削不成  
萬朵芙蓉相掩映  
九華仙掌自分明  
幽崖樹色經霜古  
絕頂松濤入夜驚  
日夕南樓增爽氣  
可能相對豁吟情

秋波

雨足江湖水色新  
碧琉璃滑淨無塵  
潮回萬頃鋪平靛  
風過千層簇細鱗  
野鷺沙鷗爭出沒  
白蘋紅蓼倩精神  
箇中浩蕩無窮趣  
都屬中流舉釣人

秋鴻

相呼相喚過南樓  
叫破江南萬里秋  
有足不傳雲外信  
無端偏惹客中愁  
影橫斜月天連塞  
夢繞黃蘆雪覆洲  
霄漢翱翔應有自  
生平不爲稻粱謀

秋花

幾朵亭亭靚晚芳  
無端淺碧間輕黃  
山墻零露開時



好野館臨風嗅處香冷豔不同桃李笑幽情肯惹蝶  
蜂忙霜禽錯恨韶光晚碎語枝頭怨夕陽

秋林

一簇高低近翠微碧雲紅樹靜依依枝垂碩果霜初  
落鳥露危巢葉漸稀僧寺樓臺臨竹塢人家煙火隔  
柴扉半竿落日斜明處又見松頭一鶴歸

秋夜

戍鼓聲傳夜未央松陰滿地露華涼苦吟不覺銀燈  
燼無寐偏驚玉漏長風靜半空聞過鴈堂虛四壁聽  
啼螿壯懷不任秋凌逼起向瑤堦步月光

詩集

卷之十一

六十一

秋聲

月淡星疎夜氣清忽聞何處動商聲初疑風雨衝愁  
至復訝波濤入夢驚寥沉似隨征鴈叫淒涼如和草  
虫鳴不須更讀歐陽賦感慨令人白髮生

秋月

冰輪湧出海東頭光映珠簾不上鈎丹桂婆娑微有  
影琉璃樓高爽不勝秋空遺靈兔千年藥不盡姮娥萬  
古愁時缺時圓成底事金樽有酒且相酬

秋晚卽景

獵獵西風捲客衣  
茫茫衰草澹斜暉  
山橫暮靄牛羊  
下樹帶寒煙  
鳥雀歸幾杵  
鐘鳴梵宇一村燈  
火掩柴扉  
林梢喜見初生月  
照我騷騑下翠微

秋日移菊

分得東籬雨後花  
呼童栽近小窻紗  
引泉灌溉滋新壤  
剖竹編圍護嫩芽  
自許琴樽相調笑  
何須蜂蝶亂交加  
杜門不納王弘酒  
還勝柴桑處士家

秋夜獨酌

詩集

卷之十一

六十一

銀燭金樽映畫屏  
消愁聊借酒爲名  
醉來却喜朱顏在  
畏老猶嫌白髮生  
無客可邀惟對影  
有燈相伴最關情  
餘醒未解不成寐  
起向瑤堦月下明

秋興四首

一夜西風動遠林  
滿襟涼意覺蕭森  
蓮花愁野渚消紅  
暈樹老閒庭減綠陰  
鏡裏霜華添客鬢  
階前雨點碎鄉心  
樓頭思婦關情切  
半壁殘燈幾杵砧

西風一夜動關山  
秋意瀟森入夢間  
鴈陣不衝愁思  
斷砧聲偏與客情關  
故園黃菊催歸興  
老圃丹楓映



醉顏脩竹苦遭窻外雨朝來也作淚痕斑

莫向樽前笑白頭異鄉景物不勝秋露寒金井梧桐  
老水冷銀塘苗苗愁落日平沙迷宿鴈西風遠浪起  
眠鷗無端砧杵驚殘夢未到江南第一州  
萬寶初成斂化功眼看秋色有無中開殘籬菊侵晨  
雨落盡庭梧昨夜風野草忽從霜後白江楓故向日  
邊紅蘆花兩岸滄江澗管領煙波屬釣翁

喜雪三首

朔吹號寒振九關滕神翦水下人間瓊葩亂發庭前

詩集

卷之十一

六十二

樹皓鶴羣飛海上山書幌不須銀燭照釣船披得玉  
簑還擁鑪兀坐無佳句對著梅華益厚顏

天時人事兩相關和氣網緼覆載間湧地銀堆千尺  
浪攢空玉立萬重山中郎持節吞氊臥大將平淮奏  
凱還往事悠悠何足論且祈豐稔解愁顏

怪來寒氣透重關風約飛花撲坐間銀海平吞雲際  
月瓊峰暗換屋頭山詩懷不爲尋梅好酒價從教輟  
俸還歲事豐穰應有兆九重喜色動天顏

雨後夜坐翫月

涼飈拂樹半含秋一雨先將暑氣收夜色遠分天際  
月清光直入水邊樓玉簫有韻驚鄉夢銀漢無波洗  
客愁遙想梧桐最深處美人和淚撥箜篌

秋興用陳繡衣韻

黃鵠摩雲壯氣增青虹貫斗劍光騰半生出處慚無  
補一代經綸學未能指下徽音彈夜月筆端草聖裊  
秋藤西風不盡思鄉意回首天涯憶舊朋

又順用韻

客邊荏苒歲華增對景空思舊日朋露冷蓮塘青結  
詩集

卷之十一

六十三

子雨晴瓜圃綠牽藤酒盃自強醒還醉宦業誰論拙  
與能彈劍高歌明月下幾迴壯氣欲飛騰

倒用秋夜酒醒韻

年來華髮不勝簪別意常懸斗柄南親舍遙瞻雲渺  
渺客居誰羨府潭潭庭涵月色人初靜樹帶霜華葉  
半酣詩興蕭條無覓處遣懷聊仗酒盃三

秋夜睡醒偶賦

風送新秋爽入簾樓頭初月正纖纖三盃上臉成紅  
軟一枕忘情到黑甜清露凝暉沾宿草明河倒影掛



脩簷客窻又動鄉關念却把燈花仔細占

秋夜獨坐復倒用酒醒感懷韻東陳繡衣

冠中白髮映朝簪馬首關山北又南魚雁鄉書淹歲  
月尊鱸歸興動江潭堂堂宦業鵬程遠碌碌浮生蟻  
戰酣煙寺昏鐘猶在耳雞聲已報五更三

再用前韻答陳繡衣

西風吹鬢雪盈簪千里瞻雲目極南天外青山圍故  
國雨中黃葉下空潭孤懷觸景情何限壯氣凌霄酒  
半酣最愛霜臺能賦客新詩賡和不離三

詩集

卷之十一

六十四

用秋夜睡醒韻

盡日西風不捲簾輕陰無奈雨連纖蓮含碧實心應  
苦瓜熟紅瓢味正甜夜半關情蛩近戶晝長乞食鳥  
窺簷兩藩彌節欣無恙進退行藏豈用占

清秋述懷倒前韻三首

老態潛從鬢裏占幾番覽鏡立脩簷仕途無愧甘清  
白世味何須論苦甜晚穀迎風青穗舞嘉蔬出土翠  
莖纖壯懷不逐秋容變一任蕭蕭雨滿簾

午漏還從日影占雞聲遠唱出茅簷鳥啼脩竹人初

靜門掩閒齋睡正甜  
客底齏鹽甘澹泊  
詩中錦繡鬪穠纖  
鳳仙零落西風急  
紅雨霏霏亂入簾

黃甲聲名舊日占  
誰論寸晷與風簷  
鬢隨金井梧桐老  
夢憶紅綾餅餡甜  
巨浪排空銀闕湧  
遠山過雨翠眉纖  
秋光惹動思鄉意  
一度登樓一捲簾

鄭州留別沈平之

秉燭連牀坐夜分  
漏聲和月度轅門  
重論幼稚多堪咲  
細數交游半不存  
最好知心成白首  
可能醒眼對金樽  
明朝又是梁園別  
兩地相思勞夢魂

詩集

卷之十一

六十五

夜半散步庭下有感

夢回孤枕夜迢迢  
迢起看星河欲動搖  
庭月涵輝銀燭冷  
窓風弄影篆煙銷  
虹光吐劔衝溟漠  
豪氣隨詩破寂寥  
盛世妨賢成底事  
湖山有約在漁樵

題唐十八學士登瀛洲圖

經濟才猷結主知  
從容館閣際明時  
都將治世安民策  
散作裁冰翦雪辭  
五鳳樓高天路近  
百花香細漏聲遲  
畫圖彷彿登瀛趣  
展玩令人有所思

移竹



移得琅玕近畫堂歲寒心事兩相當高枝直擬凌霄  
漢勁節還期傲雪霜夜靜攜琴伴幽獨晝閒移榻就  
清涼明時持汝朝天去吹向虞廷引鳳凰

送王太守宇之任

皂蓋朱轡出鳳城西風蕩漾馬蹄輕新除明府聲  
華重舊說郎官玉雪清城郭月中無犬吠山田雨後  
有人畊四方太守皆如子海宇何憂不治平

晚涼書懷

九日炎蒸一日涼晚來無事立徜徉松篁月印當窗

詩集

卷之十一

六十六

影荷芰風傳隔浦香京國雖饒非故土梁園徒好  
是他鄉何時謝老西湖上爲傍雲山構草堂

詠白海東青

重譯何須事遠求自隨和氣到中州一團冰雪含奇  
質萬里雲霄豁俊眸玉羽驚翻邊月曉霜翎點破海  
天秋親藩入貢承恩渥五色絨繚錦臂鞬

題李景昌竹間書舍圖

萬玉蕭森遶四簷坐來惟覺雨纖纖小窻展卷循環  
誦古鼎焚香取次添爽籟隨風來淨几清陰和月度

踈簾應知此地藏脩者蚤晚蜚聲不久淹

思歸詩文卷

去來無跡任翩翩千里思歸亦偶然自是斑衣勞夢想難將慧劍斷塵緣昂昂孤鶴凌蒼靄隱隱雙鳧入紫煙到日慈親應喜慰雲輶忽墜綠輿前

處靜齋卷

希夷心地本無塵聊借寰區寄此身大藥何須金鼎鍊閒情惟與白雲親庭前花影空啼鳥樹杪茶煙不見人我亦平生耽靜趣卜鄰安得共棲真

詩集

卷之十一

六十七

汴城八景

艮岳晴雲

羣峰屹立鎮中州絕頂雲閒宿雨收霞彩映紅開霽景天光澄碧湛高秋清陰每逐珠簾捲佳氣常依綵仗浮四海承平藩府樂不妨吟詠日登樓

大河春浪

冰泮洪河春意深桃花新漲湧千尋凌波釣艇綸竿濕近水人家樹木陰危岸墮沙沉鳥跡長風鼓浪聽龍吟臨流自得滄浪趣一曲高歌絕賞音



開寶晨鐘

日入斜窻曉氣清  
化王宮殿梵鐘鳴  
驚回夢幻知誰扣  
送盡年華是此聲  
地吼鯨鯢僧出定  
路填車馬客登程  
翻思待漏金門下  
正擬封章達聖明

夷山夕照

不用攜壺上翠微  
夷山相對伴餘暉  
疎林返照牛羊下  
遠樹斜明鳥雀歸  
僧逐暮鐘還寶地  
客尋旅館扣柴扉  
壯懷未盡登臨興  
一任西風振錦衣

金梁曉月

詩集

卷之十一

六十八

金梁迢遞接西城  
曉騎騰騰踏月明  
素魄隨人如有意  
餘光伴影最多情  
塵昏寶鏡輪蹄動  
樹墮冰輪鳥雀驚  
却憶彤庭朝謁處  
幾番擁笏候雞鳴

資聖薰風

傑閣凌空歲月深  
公餘乘興一登臨  
偏空殿角涼颼細  
不受人間熱惱侵  
却扇頓忘三伏暑  
昇財還憶五絃琴  
清心最是簷前鐸  
響落層霄雜梵音

吹臺秋雨

郡城東畔古臺荒  
風雨瀟瀟送晚涼  
鬢髮山川迷遠

近高低禾黍墜青黃衝開幕藹帆來重叫破愁雲雁  
過忙攜酒登高應有約莫教冷落妬重陽

百岡冬雪

凍合長河歲暮天喜看三白兆豐年東風柳絮沾衣  
袂夜月蘆花覆釣船夢客不愁添酒興標梅何必聳  
吟肩梁園詞賦應堪羨羸得新詩入管絃

二月初三日出使

春風堤上柳條新遠使東南慰小民千里宦途難了  
志百年塵世未闌身豺狼當道須鉤殄餓殍盈岐在  
詩集

卷之十一

六十九

撫巡自揣匪才何以濟只將衷赤布

皇仁

濟寧路傍古塚

伊人埋骨已多年三尺荒坵圯路邊野鳥淒涼啼落  
日石麟顛倒臥寒煙良平計策今安在房柱功名亦  
偶然弔古欲詢何代客斷碑零落獨堪憐

村舍耕夫

倚門皓首老畊夫辛苦年年歎未蘇椿木運來桑柘  
盡民丁抽後子孫無典餘田宅因供役賣絕雞豚爲  
了逋安得歲豐輸賦蚤免教俗吏橫催租



路傍老叟

路傍遺老亦堪悲，問着倉皇只淚垂。  
恒產賣餘無業次，比隣逃盡少親知。  
衰殘滿冀昇平日，饑困仍逢旱澇時。  
見說朝廷寬賑恤，也來叩首拜恩私。

梁園

自古梁園佳麗地，于今寂寞減繁華。  
日長野店聞啼鳥，春暮山城見落花。  
綠柳兩行侵洛遠，黃河一帶入淮賒。  
欲將尊酒舒高興，錦帳風流愧党家。

徐州戲馬臺

詩集

卷之十一

七十

落日遙登戲馬臺，懷鄉弔古獨徘徊。  
關河千里雁頻斷，風雨一天愁不開。  
霸業盡銷人已去，山形依舊我重來。  
何須細問興亡事，自是當初少用才。

沛縣歌風臺

荒臺遺址尚差栽，過客經遊感慨多。  
逐鹿未傾秦社稷，斬蛇先定漢山河。  
功臣累見收封爵，猛士誰能爲執戈。  
父老尚知千古事，豈空重問大風歌。

病猿

鎖向虛廊不自由，倦舒雙臂懶擡頭。  
巴山夢斷霜華

冷梅嶺情牽樹影秋入定老僧心暫釋感時遷客淚  
初收高門廣廈多豪富未必聞聲便有愁

題湛虛卷

仰看星斗屋無椽小住寰區八百年兔挾冰輪澄性  
海龍嚼火炬照心田臥雲枕上何曾夢賣藥壺中別  
有天門外紅塵走車馬幾人來此扣玄玄

秋夜賞月

風清月白水無波不飲其如良夜何美酒千鍾舒逸  
興洞簫一曲和高歌香浮綺席飄丹桂影落金盃灑  
素娥沉醉卻疑霄漢近乘槎直欲泛銀河

詩集

卷之十一

七十一

送平江侯出鎮臨清

鼓笳載道出 神州鏖騎連雲擁列侯綵旆行穿花  
外路紫騮嘶近驛邊樓寸心深慰黎民望一面全分  
聖主憂千里桑麻齊魯地呻吟從此變歌謳

夜坐偶題

寶篆香銷夜漏分娟娟霜月冷侵門雁聲偏惹離情  
動燭影能欺老眼昏碌碌浮生驚節換悠悠往事共  
誰論寒更五點星河澹又聽晨雞唱遠村



晚坐窻下偶題

車聲軋軋近墻東，雁陣翩翩信晚風。  
籬角黃花疎雨後，樹頭紅葉夕陽中。  
湖山舊業書連屋，江海狂歌劍倚空。  
可怪流年雙雪鬢，相侵何事太恩恩。

欲登樓未果先賦一律以見意

紅葉黃花殿晚秋，碧雲青嶂倚南樓。  
江湖汗漫迷歸路，草木蕭條動客愁。  
一自衣冠辭鳳闕，幾番風雪擁貂裘。  
中州不盡登臨興，欲上層霄豁遠眸。

蘇李泣別圖

詩集

卷之十一

七十二

嚼雪吞氈瀚海頭，旄落盡恨悠悠。  
孤臣不爲一身惜，降將應懷萬古羞。  
虜塞旅魂驚永夜，秦關歸興動高秋。  
表忠麟閣圖形像，未數當年博陸侯。

送黃郎中順陞湖廣叅議提點太和宮

旌旆翩翩拂彩霞，承恩清曉出京華。  
錦衣天上神仙客，華屋山中宰相家。  
芝草九莖同毓秀，榔梅千樹正開花。  
此行便與塵凡隔，何用秋乘八月楂。

示晁

時予雙親在堂，畱晁代養於杭。

阿晁今年已十三，耳邊垂髮綠鬢髮。  
好親燈火研經



史勤向庭闈奉旨甘啣 命年年巡塞北思親夜夜  
夢江南題詩寄汝非無意莫負青春取自慚

得外舅安豐董先生書

悠悠遠別幾經年極目江南思渺然客底正勞千里  
夢天邊忽墮五雲箋得官自媿超遷早濟世深慚學  
術偏瞻仰泰山應未遂馬蹄明日又翩翩

送中書舍人內弟董仲魯奉使親藩

奉使親藩屬俊才寧親此日遂歸來天涯游子十

年別堂上慈顏一笑開北闕風雲新節鉞西湖煙

詩集

卷之十一

七十三

雨舊樓臺痴兒相見應相問好帶平安兩字來

輓兵部柴尚書

權兼將相竭忠誠文武全才屬老成廊廟雍容時望  
重邊陲談笑虜塵清白雞忽憶當年夢青史應垂萬  
古名嗟我忝居鄉曲後謾歌楚些寄哀情

悼內六首

垂老光陰兩鬢皤細君棄我竟如何夫妻一旦世緣  
盡兒女百年恩愛多曉閣空懸臺上鏡春衣誰試篋

中羅客邊聞訃腸先斷淚落西風鼓缶歌



世緣情夢總成空二十餘年一夢中疏廣未能辭漢  
主孟光先已棄梁鴻鐙昏羅幔通宵雨花謝雕闌驀  
地風欲覓音容在何處九原無路辯西東

縹緲音容何處尋亂山重疊暮雲深四千里外還家  
夢二十年前結髮心寂寞青燈形對影蕭疎白髮淚  
沾襟篋中空有遺書在把玩不堪成古今  
塵寰冥路兩茫茫何處青山認故鄉破鏡已分鸞鳳  
影遺衣空帶麝蘭香夢回孤館腸千結愁對殘鐙淚  
萬行抱痛苦嫌胸次窄也應無處著淒涼

詩集

卷之十一

七十四

東風庭院落花飛偕老齊眉願竟違幻夢一番生與  
灰訃音千里是耶非淒涼懷抱幾時歇縹緲音容何  
處歸魂斷九泉招不得客邊一日幾沾衣

房櫳寂寞掩春風百歲情緣一旦空世態不離生歎  
內夢魂都在別離中可憐孤館月華白猶憶香奩燭  
影紅老眼昏昏數行淚客邊從此恨無窮

送顧克新南還

都門三月柳飛花把酒相看日未斜克貢已看先得  
意承恩仍喜蚤還家輕風細浪征帆穩芳草長亭

客路賒君去故園春尚好令人歸思滿天涯

春陰感懷

連日輕陰雨未成萬株烟柳暗春城野花偏向愁邊  
發池草多從夢裏生越水吳山頻引領沈腰潘鬢不  
勝情何時歸去西湖路載酒攜柑聽早鶯

重陽感懷

晝景如梭夜漏長又驚節序是重陽江風點綴秋光  
好籬菊包藏晚節香多事未容陶令去老懷難學孟  
嘉狂蕭條孤館誰相問獨對西風一舉觴

詩集

卷之十一

七十五

新年客懷

客底光陰似水流又看五十五春秋深慙一品三孤  
秩敢望千金萬戶侯輦路塵清殘雪在御爐香煖瑞  
煙浮老來况味俱蕭索只有歸心不自由

暮秋感懷

重陽節後北風多景物蕭條可奈何葉帶寒聲風外  
落鴈隨霜信月中過愁來萬事紛如結老去孤忠耿  
不磨偷得浮生片時暇凭闌搔首且吟哦

元日述懷



錫宴歸來靜掩扉臥看初日轉斜暉避喧不欲輪蹄  
駐得食從教鳥雀飛遠道水霜情脈脈故園梅拚思  
依依新年祝願無他事惟乞 皇恩早賜歸

王一寧學士哀輓

內相方承寵渥新那堪鵬鳥集承塵文章功業成千  
古臺閣絲綸少一人慷慨惟論天下事淒涼空憶夢  
中身向時談笑皆陳迹惟有臨風泪滿巾

直廬歲暮

直廬蕭索度殘年靜夜焚香思悄然市遠不知沽酒

詩集

卷之十一

七六

價庭空惟見煮茶煙風穿疎牖銀燈暗月轉高城玉  
漏傳歸興漸隨生意動昨宵清夢遶林泉

送知縣莫文淵致仕歸錢塘

解組還鄉未白頭身安意適復何求六橋有路間來  
往萬事無心任未畱闔境吏民思舊澤入門兒女具  
新芻明朝我亦休官去同向西湖理釣舟

送江用亨下第

賈生年少負奇才射策無成又獨回歲鳳不隨凡鳥  
語好花偏向暮春開都門煙樹關情遠故國湖山入

夢來浪煖桃香三載後禹門還聽一聲雷

和何知州交趾歿節韻

凜凜英風震百蠻巍巍砥柱屹狂瀾自緣忠義存心  
正不惜從容就歿難瘴海雲迷歸路遠邊城月照旅  
魂單衣間別有文山句千載令人拭淚看

秋閨二首 附錄

散步瑤堦下庭空不見人回頭顧明月惟有影隨身

其二

莫向池邊去芙蓉花正開近來憔悴甚因是被風猜

詩集

卷之十一

七十七

七夕二首

卜妻忌辰

夜靜銀河冷天高玉露清雙星緣底事千古若為情

其二

華月窻間過涼風扇底生撫時追往事幽恨不分明

送道士史志中

不駕青牛西出關却乘畫鷁向南還枕中鴻寶千金  
秘袖裏龍光一劍閒潞水薊門分別處岸花檣燕送  
畱間蓬萊到日春將老想見碧桃開滿山

七言絕句



豫讓橋懷古

豫讓橋邊策馬過當年意氣未消磨人臣報主空如此  
成不成功可奈何

平陽道中

楊柳陰濃水鳥啼豆花初放麥苗齊相逢盡道今年  
好四月平陽米價低

列石挽竇鳴犢

列國難逢世主賢孤忠非命亦堪憐臨河不返宜尼  
轍未必聲名萬古傳

詩集

卷之十一

七十八

曉發太原

鳴騶擁道出邊城月澹星踈騎火明驛路經行三十  
里漏聲猶自報殘更

過汜水觀曾典史所種樹感懷一絕

化洽民心久未忘路傍嘉樹比甘棠我來憇馬清陰  
下淚洒薰風一斷腸

過滎陽

鴻溝迢遞接滎陽芳草瀰漫古戰場說盡興亡無限  
事數聲啼鳥在垂楊

過汜水

清汜垂虹貫濁流，峭關虎踞瞰中州。  
山河不盡登臨興，兩裊春風獨倚樓。

橫望巡檢司

在大行之中

獨倚危巖拭遠眸，青山環合白雲浮。  
孤標中斷分南北，半是覃懷半澤州。

讀王荆公趙清獻公文集

新法殃民衆欲除，金陵強辨欲何如。  
等閑一語鋒鋦折，稷契當年豈讀書。

詩集

卷之十一

七十九

暮春遇雨

暖風吹雨浥輕塵，滿地飛花斷送春。  
莫上高樓凝望眼，天涯芳草正愁人。

村舍桃花

野水縈紆石逕斜，葦門蓬戶兩三家。  
短牆不解遮春意，露出緋桃半樹花。

夜坐

朦朧淡月映窻紗，坐聽嚴城動鼓笳。  
自是歸期難准信，生憎銀燭又開花。



題孟浩然踏雪尋梅

滿頭風雪路欹斜，杖屨行尋賣酒家。  
萬里溪山同一色，不知何處是梅花。

夢中作

青鸞穩駕紫雲車，天上歸來月欲斜。  
吹斷玉笙人去遠，瑤池開遍碧桃花。

除夜宿太原寒甚

寄語陽和及蚤來，何須堤柳與江梅。  
五更月落天雞唱，更有城頭畫角催。

詩集

卷之十一

全

元日寓太原分司獨坐感懷

客中况味似枯禪，歲月無情任轉遷。  
不是五更開爆竹，那知今日是新年。

太原縣元日卽事

青袍縣吏候庭叅，慶罷新正酒半酣。  
不道并州倦遊客，夢回枕上憶江南。

不凭闌

晚晴公館有餘閑，獨上危樓望遠山。  
散盡白雲收盡雨，歸鴉背得夕陽還。

朝燈花鵲噪

鵲噪燈花亦偶然人間喜信只虛傳  
朝朝暮暮知多少悞却歸期又隔年

合中小樓春望

小樓十二曲闌杆  
曲曲闌杆見遠山  
望盡夕陽芳草色  
天涯遊子幾時還

殘春漫書

借問春歸何處所  
天涯芳草路茫茫  
楊花不解留春住  
空逐東風上下狂

詩集

卷之十一

十一

讀叅同契有感

蓬島瀛洲事渺茫  
嬰兒姹女竟分張  
仙凡自古雲泥隔  
空讀人間不灰方

宋宮

龍樓高處彩雲飛  
艮岳纔成事已非  
寂寂長門金鎖合  
中州無復二龍歸

七夕

鵲橋千丈跨銀河  
夜靜風恬水不波  
牛女相逢又相失  
歡情不似別情多



鴈字

界破青天印碧波分明點畫與波戈右軍不識其中  
意却把黃庭換白鶩

雨中山竹

濕雲拖雨過前山遠樹冥冥煙霧間碎石亂流人不  
渡晚來惟有一僧還

春歸

紅芳老盡綠陰肥到處楊花作雪飛塞北從來無杜  
宇不知何物動春歸

詩集

卷之十一

八十二

山行駐馬

沾衣數點雨餘雨極目萬重山外山立馬平原看秋  
色獨憐寒菊暎衰顏

上太行山

西風落日草班班雲薄秋空鳥獨還兩鬢霜華千里  
客馬蹄又上太行山

春寒喜和暖

東風消盡山頭雪和氣挽回天下春笑殺堤邊千樹  
柳纔舒青眼便窺人

臘月二十四夜口號

金鑪銀燭夜生春，爆竹聲催節候新。  
自笑中年強隨俗，買錫裂紙祀廚神。

十七夜鐙

一盃濁酒送殘鐙，歲月無情感慨增。  
垂老漸忘兒女態，從教客况似山僧。

讀悟真篇

金丹元只在紅塵，混俗方能得至真。  
自是書生守名節，莫慙辜負指迷人。

詩集

卷之十一

八十三

春曉

曉風吹月下長空，漸覺東窗日影紅。  
寄語鄰雞莫驚覺，家山正在夢魂中。

蚤春卽景

弱柳千條拂地垂，向陽亭館日遲遲。  
杏花最得春光蚤，屋角斜橫四五枝。

春日寫懷

賞心樂事久蹉跎，景物關情奈尔何。  
獨上高樓望鄉國，一川芳草夕陽多。



暮春小雨

霏霏小雨不沾衣，細逐斜風密又稀。  
好濕香塵沾柳絮，莫教零亂送春歸。

貪睡

氣昏無奈困人天，纔說看書便欲眠。  
分付家童添活火，莫教斷却煮茶煙。

宿徐溝

霜臺寂寂夜無譁，遠近邊城動鼓笳。  
客路瀾漫歸思遠，絳臺銀燭謾開花。

詩集

卷之十一

八十四

登太行思親

馬足車塵不暫閑，一年兩度太行山。  
庭闈縹緲孤雲下，遊子思親幾日還。

黃河舟中

順風催浪片帆輕，頃刻奔馳十數程。  
舵尾炊煙猶未熟，船頭已見汴梁城。

又

天風吹我渡黃河，鼓柁中流發棹歌。  
昨夜一番甘雨降，魚龍無數沐恩波。

夏日憶西湖風景

湧金門外柳如煙西子湖頭水拍天  
玉腕羅裙雙蕩槳鴛鴦飛近採蓮船

野景

千山萬山白雲起三片五片紅葉飛  
野寺蕭條門半掩夕陽滿地一僧歸

汝寧懷古

卽古蔡州

鴛鴨池荒蔓草生沙河如帶繞孤城  
平淮事業誰能繼撫景令人恨不平

詩集

卷之十一

八十五

題光武拔倒井

在裕州北四十里

天相中興不偶然等閒平地湧清泉  
靈源千古蛟龍蟄時出人間救旱年

過南陽挽孔明

三面英雄正角持孤臣生歿繫安危  
大星不向營前墜混一寰區未可知

過彭祖店

在烏陵縣北二十里

年垂八百竟如何終見浮生逐逝波  
服御無人傳秘訣道傍高塚漫嵯峩



雪晴

日照九達銀路直天開四面玉樓寒無邊景物誰收  
拾分付詩人獨倚欄

不曉起感懷

鐘聲驚散樹頭鴉窻戶微明月影斜鏡裏衰顏隨節  
換數莖白髮映烏紗

無題

莫向東風折柳枝柳枝纔折便興思紅塵鞍馬紅亭  
路却似當年送別時

詩集

卷之十一

八十六

春日野景

柳條纔老杏花繁紅綠參差出短垣野犬數聲迎客  
吠屋頭風細酒旗翻

自嘆

紅塵踪跡厭驅馳况復年來兩鬢絲擾擾太行南北  
路不知何日是歸期

宿仁義驛

公館蕭條行處遠山深地僻少人煙窻風吹夢不成  
寐獨擁青綾思悄然

清源分司林檎花

龍蔥一樹玉生香，半露晴梢出短墻。  
冷淡不關蜂蝶夢，可能無語怨韶光。

顧生葵菴卷

南薰薦爽入瑤琴，戶外莪葵錦作林。  
不是貪看好顏色，祇憐一點向陽心。

題畫菜

青紫均霑雨露恩，一團生意淡中存。  
食前方丈倘來物，大節還須咬菜根。

詩集

卷之十一

八十七

春圃生意圖

膏粱難近腹中書，賴有羣蔬薦客廚。  
不獨澹然忘世味，更存生意滿寰區。

棲霞亭卷二首

丹成隨處是仙家，何必蟠桃萬樹花。  
壘膝茅亭心侶水流光滿目，絢丹霞。

餐霞服日總虛傳，識得棲真始是仙。  
獨擁蒲團亭上坐，凝神遙在五雲邊。

題蒲萄圖



一夜轟雷震九垓明珠幻出老龍腮  
摘來釀酒三千斛獻作吾皇萬壽杯

題畫

負重那堪路更賒行行未得到山家  
老妻稚子應相望回首柴門日欲斜

孤雲

孤雲出岫本無心頃刻翻成萬里陰  
大地蒼生被甘澤成功依舊入山林

張鐙偶題

詩集

卷之十一

八十八

客中無計可消愁隨俗張鐙向小樓  
月自團圓鐙自好老懷不似舊風流

并州元夕

滿城鐙火走兒童萬朵金蓮照地紅  
獨有并州倦遊客夢魂飛遶鳳城東

并州初春寫景

塞上尋春不見春邊風日日走紅塵  
多情祇有庭前柳微弄腰肢慰藉人

初春睡起寫景

雪消土潤草痕青  
煙暖風柔柳帶輕  
啼鳥一聲來枕上  
夢回春意滿山城

暮春客途卽景

雨中紅綻桃千樹  
風外青搖柳萬條  
借問春光誰管領  
一雙蝴蝶過溪橋

擬吳儂曲三首

憶郎直憶到如今  
誰料恩深怨亦深  
刻木爲雞啼不得  
元來有口却無心

憶郎憶得骨如柴  
夜夜望郎郎不來  
乍喫黃連心裏

詩集

卷之十一

八十九

苦花椒麻住口難開

儂在西邊郎在東  
深堂宅院幾重重  
浮麥磨來難見面  
厚紙糊窗不漏風

淵明像

杖屨逍遙五柳莊  
一辭獨擅晉文章  
黃花本是無情物  
也共先生晚節香



于忠肅公集卷之十二

明錢塘于謙廷益甫著

序

趙尚書詩集序

清明純粹之氣瀰滿於天地間騰而上者昭布森列而爲日月星辰凝而下者流峙發生而爲山川草木鍾於人者表著呈露而爲文章事業其生也有所自其出也有所爲其製作也有所關係豈偶然耶刑部尚書大梁趙公以鴻才碩學遭際 盛時敷歷華要

文集

卷之十二

一

聲實著聞其雍容廟堂之暇旬宣方岳之餘怡情適趣發爲辭章長篇短什操楮立就有沈雄而典重者有舒徐而優柔者有平衍而冲澹者有光彩煥發而豪宕放逸者有清新流麗而慷慨悽惋者變態縱橫不一而足如八音迭奏而畢中其節如百貨具陳而各適於用如五味相資而各適諸口豈區區拘泥聲律而摹倣前人於萬一者之可擬哉是皆清明純粹之氣自肺腑中流出有莫知其所以然而然者嗟夫公一代偉人也才與位稱出與 時會功在 朝廷

澤被生民而辭章特餘事耳固未足以盡公然欲知公之出處與其人品才器者亦可於此而槩見且以知天地之氣所以鍾於公者固不偶然也於是乎書送周御史致仕還鄉序

士君子之出處固貴乎有道亦貴乎際時蓋道備於吾身而時則關乎氣運有其道而際其時此進退之所以盡善也侍御周公自胄監發身居方岳司風紀任民社歷事累朝出入華要者三十餘年晚以御

史致仕南還朝之士大夫咸爲歌詩以華其行屬余

文集

卷之十二

二

序其首簡余惟朝廷以忠厚待士以恬退厲俗凡

士之特達有爲者必待以不次之擢俾得伸其志而

恬退自守果於退休者亦不强之以事譬之天於萬

物發榮滋長歛華就實各遂其性而不相凌奪士生

斯世抑何幸歟公之南還也峩冠博帶徜徉於里閭

之間夷猶於湖山之表子孫扶攜杖屨逍遙鄉之老

稚咸指而羨曰朝廷待士之厚如此公之遭際

盛時進退盡善又如此是不獨爲鄉里之榮亦邦家

之光也若夫情景之富則諸公之吟詠盡之矣而余



不贅云

玉岑詩集序

詩豈易言哉發於心形於歌詠盡乎人情物變非深於理而適於趣則未易工也同郡洪遂初蚤有能詩名郡中景物經其題詠甚多晚而涉歷四方所見益廣而所作益富萃而爲卷因其自號而命之曰玉岑集徵余序之余觀其命意高遠遣辭春容冲淡而不流於鄙俗清婉而不傷於綺麗如大羹不和而真味自存如止水無波而澄景自見視彼之穿鑿鋪敘似

文集

卷之十二

三

若可觀而求其氣脈則索然者大有逕庭矣雖然余又有說焉大凡士之未得志者其氣未免於不平而言亦隨之今遂初於未達之時而所作溫粹和平如此是尤不可及也非深於理而適於趣者能之乎東南之士於詩者余於遂初有望矣異時出以鳴國家之盛何難之有良金美玉自有定價此詩之傳固無待余序姑述所見以俟知者

送董序赴鄉試序

內弟郎中君之子董序將赴浙江省試告別於余請



言以壯其行余憶序幼時穎敏秀異皆白溫潤如芳  
蘭美玉聰慧特甚授以詩書輒能記憶成誦雖經久  
不少遺忘每一講解必領會其意比長爲學益進識  
益廣文辭日益瞻爲經義數百言操楮立就皆出人  
意表余甚愛重之已而從監察御史吉安周瑚黃門  
給事京山嚴誠學日就月將駸駸底於成就斯行也  
其得雋秋闈不待謀之著龜而可必矣然余之所望  
有不止於斯焉何者天地間英明清淑之氣不鍾於  
物則鍾於人鍾於物則非常物而爲奇物鍾於人則  
非常人而爲偉人序之抱負造詣如此而又出則名  
門蒙先世之澤承父師之訓際 休明之運繇是而  
擢巍科登顯仕功名事業炳炳朗朗於宇宙間而爲  
一代偉人是則予之所望於序也利祿聲譽云乎哉  
鄉邦誇耀云乎哉予老耄踈陋文學非其所長重序  
之請因書以贈

高僉憲挽詩序

山西僉憲高君以疾卒于官同寅暨藩閫諸公與晉  
陽士大夫咸爲詩以哀挽之屬余序其首余惟高君



行純才瞻外圓內方操履設施有大過人者文章餘  
事爾初以名進士起家授冬官主事轉郎中居官以  
廉能稱尋以疾請退休于家 聖天子嗣大歷服詔  
求學行絕倫之士授以憲職俾提督海內學校遂用  
少保大司空吳公薦起授今職下車之始卽以敦厚  
風俗作興人才爲己任巡行郡邑雖隆寒盛暑所不  
憚與師儒講論經史諄諄不倦或至忘寢食勤勞積  
久而故疾復作遂以弗起訃聞遠邇哀之初君之來  
晉陽也廨舍與予行部相邇過從甚密遇事輒相與  
籌度益予爲多暇則倡和文辭以爲樂一日不聚首  
則快然無所爲懷旣而余以議事還 朝復來晉陽  
惟恐見君之晚而君已長往矣嗚呼思談論而言猶  
在耳覩詞翰而遺墨如新茫茫九原斯人莫作其哀  
傷寧有旣耶因書此以識意

文集

卷之十二

五

贈醫士李思宗序 恩命貳夏官出撫  
余自弱冠登第歷官臺憲尋奉 恩命貳夏官出撫  
河北太原深惟親老不能躬養也遂畱子冕侍膝下  
時冕尚幼尤吾親所鍾愛恒以寒暑失調致疾而吾



親以爲憂每疾作則迎邑之世鑿李思宗治之思宗  
見理明而操術精矜候正而取効速投劑之餘厥疾  
應手而愈旣而酬之以錙則辭而弗納去年冬余奉  
命還朝會家君亦以受封謝恩來京師具以語  
余竊笑曰吾所以畱其子以待父母者期於承顏膝  
下悅其心而慰其念也顧乃致疾而貽親之憂於吾  
心豈能一日安耶賴思宗治之則吾子之疾旣愈吾  
親之憂亦釋而於區區之心其庶幾矣且不責其報  
不受其直其用心何其厚耶與屑屑然較錙銖之利  
而不以濟人利物爲心者有不可同年而語矣昔人  
有種杏揮金而不責報者思宗其近之執此以往他  
日術鳴於時名播於後董奉李杲之儔豈得專美於  
前耶顧余受思宗之惠而乏報也因書此以致意云

余  
驄馬行春詩序

其

子

思

宗

文

集

卷

文集

卷之十二

六

春爲四時之首而主乎發生物之歛者至是而舒氣  
之慘者至是而和故爲政者順時布令所貴宣  
德而恤民隱此驄馬行春之卷所由作也侍御李君  
之居憲職奉命出巡滇南冀北兩藩每春晴景明



氣舒物暢之時或出近郊或巡遠郡務以採納風謠  
省視民俗爲事不以閭閻吠畝爲僻陋不以鞍馬跋  
涉爲勞憊隨其所至而休焉雖田夫野老亦必諮詢  
而盡其情所欲與興所惡與除事之抑鬱而矇昧者  
亦皆與之伸理而昭雪如陰崖沍谷霜雪凝結陽春  
一照而品物皆忻忻然有生意行春云者春不在造  
化不在品物而在吾身心一轉移運動之間余抑余  
聞之是春也在造化爲元在人心爲仁其用則仁民  
愛物其效則國治而天下平李君能有是心則必能  
致其用而極其効矣余舊居李君之官而尸官任李  
君之職而曠職嘗出巡江右諸郡旣而擢貳夏官奉  
命巡撫徒效驅馳於兩閩而不能宣 朝廷德澤以  
及於生民因君驄馬行春而重有慨焉昔人謂宋廣  
平爲有脚陽春余每愧之敢以是望於李君若夫景  
物之富與行樂之情則諸縉紳之吟詠盡之矣茲不

贅

文集

卷之十二

七

賦

雪賦



寒光皎皎曙色蒼蒼客有掬衣而前唵峒子呼而語  
曰臘前三白之事子能賦否客跪而賦曰嚴乎凜哉  
冬至之後未成三戌也飄飄揚揚遍滿八氣似鷲毛  
之翦碎猶蝶翅之輕狂散玉龍之鱗甲布玉兔之疆  
塲比梅花而六出對夜月以清光遠而望之峰巒傳  
粉全不相類乎秋霜近而視之庭階藏翠却也彷彿  
乎冰亾袁安固志僵臥林靖適興尋芳灞橋詩思最  
妙藍關馬足難行持漢節則和羶而食賦梁園必置  
酒而嘗乘舟訪戴映雪惟康綃金帳中飲羊羔而低

文集

卷之十二

八

唱紅爐火上烹雀舌以馨香東廓全無履屐定夫專  
候門墻廣寒宮前倏忽幻成瑤階玉樹章華簷下須  
臾好是玉宇牙牀宇內三千大千銀界簷前一滴兩  
滴瓊漿如斯而已其言也許旣而請唵峒子曰三白  
事態則弟子已吐布矣臘前爲瑞其意云何唵峒子  
曰噫嘻乎子來前聞瓦釜池蛙者豈足以知黃鍾清  
越之奏騎跛驢駑駘者曷足以知綠驥白駒之良三  
白之在臘前也陽氣未發品彙未生根荻尚在于土  
中枝柯已枯於地下斗柄建丑玄冥司鄉正欲寒沍



以嚴凝方因陽和而發暢虫蝗有子必斃宿麥之植  
多繁所以爲治世之禎祥豐年之卜筮也猗與盛哉  
原其所由豈虛其應實我朝君明臣良民安國泰  
敷和氣於兩間播仁風于萬宇由是光岳效靈之地  
體信達順五穀豐登而爲年之大有也况今下官司  
馬匹卿大臣撫安黔黎廣推恩化能體皇上之心焉  
以格年豐之兆也客拜稽首而歌之曰同雲密布兮  
瑞雪漫漫豐年慶會今朝野騰懽對闔闔而祝願兮  
皇圖如磐石之安

文集

卷之十二

九

記

終慕堂記

慕之爲言思也人有不能無思志於功名者思進  
取志於恬靜者思退休睽違久則思會遇困阨久則  
思富足此皆常人之思未得則思得之則弗思矣雖  
思矣奚能久而不忘乎惟仁人孝子之思一不越乎  
天理人倫而亦無間於久暫始終此監察御史張君  
終慕之堂所以作也君蚤失怙恃祿弗逮養因以終  
慕顏其所居之堂以志其思於無窮縉紳大夫士多



爲詩以歌之間嘗屬余言以記余惟父母者吾身所  
自出生育之恩與天地相爲無窮故人孝子父母  
具存猶一息不敢忘矧歿而弗存其有弗思者乎嗚  
呼哀哀吾親九原莫作盈俯仰間凡觸於目而感於  
心者皆吾親之所存罔極之恩與此身相爲存亾而  
未嘗頃刻離于懷豈特感風雨霜露之悽愴念琴瑟  
栝棬之手澤而已耶且吾聞之君親雖異名忠孝無  
二理古者求忠臣於孝子之門良有以夫今君際

明盛之時居可爲之位而忠厚廉潔又有過人者尚

文集

卷之十二

十

當移不忘乎親者施於有政爲上則思爲德無一息  
忘乎朝廷爲下則思爲民無一息忘乎蒼生以至  
上而簡在宸衷下而得乎人心者亦不忘乎君俾  
先人聞之皆懽忭於地下則永慕之推不可勝用仁  
人孝子之用心於是乎極致矣豈徒爲無益之思而  
已耶君曰然遂書以爲記

開封府重修廟學記

夫子之道天之道也天之道亘萬古而不息夫子之  
道歷萬世而無弊刪述六經昭揭宇宙日月之照臨



也教化之澤洽于人心雨露之霑被也所謂生民以  
來所未有三伐以降君天下者未有不循此而能治  
者也我朝列聖相承咸用此道內而京畿外而  
郡邑莫不建立廟學以祀孔子以育才俊所以資化  
源而崇教本也開封爲中州里郡故有廟學歲久隳  
圯儀觀弗稱前郡守黃公瑾有志作新成功僅及一  
二而以休致去今郡守舒侯下車之初卽以興起斯  
文爲己任遂極力爲之而方牧諸公咸捐俸資以助  
經費於是增卑而爲崇闢隘而爲廣飭陋而爲華自

文集

卷之十二

十一

禮殿講堂以及諸生肄業會食之所莫不畢備規制  
宏麗視昔有加郡博士黃琮謂此不可以無記因率  
諸生來請余言余惟夫子之道如天朝廷作人之  
化亦如天諸士子生際盛時沐浴清化又有賢方  
牧郡守以作興之廟學之新文化之新也儀觀之盛  
士風之盛也關係豈偶然邪爲師弟子者朝于斯夕  
于斯絃誦于斯游息于斯其亦知所本乎苟知所本  
則涵養本源砥礪素行學必造其根柢而弗專事乎  
言語文字之末異時出則致用得志則力行其道事



與志違則求無媿於名節無媿於天地鬼神而後已  
若然則無負於聖人在天之靈無負於朝廷作人  
之化而亦無負於天矣則於郡守作典之意豈不重  
有光耶侯名瞳字仲曦浙泉姚江人以名進士起家  
拜黃門郎被薦出守是舉也足以知其善政云

林亭遠眺記

人不能以無思而其思必有所感觸於目而存乎心  
接於外而動乎內於是乎一草一木之微皆有所因  
寄矣此長史吳君之林亭遠眺所以有感於思親也

文集

卷之十二

十二

君以重厚謹恪爲親藩輔佐歷任旣久忠慎著聞

朝廷贈其父母如已官君恒以祿弗逮養爲痛每翊  
導之暇登高望遠淒然動風木之悲因爲林亭遠眺  
詩卷以寓意縉紳大夫士多爲詩以歌之暇日徵余  
言以記或者曰山川原隰烟雲草木物之無情者也  
古人擇勝登眺不過假之以寄傲睨之情發吟詠之  
趣而已今吳君之於林亭遠眺意不越此且君之故  
鄉去汴幾千里限之以太行阻之以大河極目無際  
初非有松楸之在望與丘壟之可指也是何與於思



親邪余曰不然物固無情而人則有心以有心之人而感於無情之物則物不徒物矣吳君登眺之頃雖目之所接者物而心之所存者親雲物慘舒親容之喜戚也花木榮悴親顏之盛衰也故朝而遠眺也則見夫煙銷日出晨光熹微親存而興之時也今也則亾欲盡晨省之禮可得乎暮而遠眺也則見夫斜陽返山餘靄棲樹親存而息之時也今也則亾欲盡昏定之禮可得乎目斷千里心馳九原又奚以遠近爲計哉若曰假山水以寄傲昵之情對景物以發吟咏

文集

卷之十二

十三

之趣此特騷人墨客之所爲而非仁人孝子之用心是豈足尚哉古人謂一舉足而不敢忘父母吳君其庶幾矣或者曰然因書以爲記

綠筠書舍記

余按部至鄭州適故人沈平之爲其郡文學平之延余坐泮水東小軒內不施丹雘以爲塗飾外不植花卉以資玩好蕭然一室自圖書之外無長物惟繞舍藝竹數百竿疎密間出生意闐然余顧而樂之因徜徉其間但見綠雲匝地蒼雪舞簷幽禽自鳴晝景寥



寂少焉清風徐來天籟振發如聆簫韶琴瑟日光穿  
雲翠影散亂如覩翔鸞翥鳳一頃刻間而物變之接  
於目者千態萬狀余與平之相對忘言心境悠然如  
在淇園湘水而不知其爲中州車塵馬足間也嗟夫  
心固爲一身之主宰然未嘗不隨物而應余出撫兩  
鬪者十年所過名山大川不可勝計中間豈無佳處  
曾不一留意而斯軒寓目之頃塵慮頓忘如此然則  
平之朝夕之所得者又當何如邪平之外秀穎而內  
清介不苟同流俗以側媚于人觀其好尚可以知其

文集

卷之十二

十四

人云

贊

宋文丞相畫像贊

嗚呼文山遭宋之季徇國以身捨生取義氣吞寰宇  
誠感天地陵谷變遷世殊事異坐臥小閣困於羈繫  
正色直辭久而愈厲難欺者心可畏者天寧正而斃  
弗苟而全南面再拜含笑九泉孤忠大節萬古攸傳  
載瞻遺像清風凜然

劉侍講畫像贊



鍊石肝腸冰玉精神超然物表不泥一塵古之君子  
今之蓋臣才足以經邦濟世學足以尊主庇民持正  
論以直言遭奸回而弗伸獲乎天而不獲乎人全其  
道而不全其身 聖明御宇景命惟新卹典有加光  
生縉紳遺像斯存儼然冠巾望之者如聆虞廷之鳳  
仰之者如覩魯郊之麟噫斯人也正孔孟所謂取義  
成仁者歟

徐尚書畫像贊

軀幹玉立標格冰清既屹然而山峙亦渾然而天成  
文集 卷之十二 十五

敷歷顯要遭際 聖明奉使南交布恩信於遠夷贊  
畫機務作屏翰於上京行諸事業軒豁俊偉存諸方  
寸正大公平被 寵榮於身後謚以表乎忠貞錦衣  
犀帶儼然平生然而一點靈臺炬然長存而竝乎光  
岳之精者又非丹青之所能彷彿而贊述之所能重  
輕也

頽國武襄公楊洪畫像贊

神完氣克顏偉言揚江湖宇量鍊石肝腸胸盤韜略  
而鬼神莫測手操劒戟而星斗垂芒摧鋒萬里轟雷



迅電號令三軍烈日秋霜功在 朝廷威振邊疆一  
騎前驅萬夫莫當旌旗所指犬羊遁藏知其內者以  
爲孫吳管樂識其外者以爲衛霍關張曰福曰壽自  
天降祥尔公公侯子孫蕃昌噫斯人也所謂勲業蓋  
世而身名流芳者歟

### 小像贊

眼雖明不能見幾腹雖大不能容人顏不足以出衆  
德不足以潤身其性雖僻其情則真所寶者名節所  
重者 君親居弗求安逸衣弗擇故新不清不濁無  
屈無伸遭 時明盛濫廁縉紳上無以黼黻 皇猷  
下無以潤澤生民噫若斯人者所謂生無益於時歿  
無聞於後又何必假粉墨以寫其神邪

### 祭文

祭亡妻淑人董氏文

時巡撫河南山西淑人歿于京

哀哀吾妻既淑且賢歸我于門二十餘年柔婉貞順  
委曲周旋上奉舅姑下睦娣族庭無間言家道雍睦  
女紅之暇誦讀書詩每有所得輒爲文辭吾家素貧  
日用節儉子能安之澹而弗厭吾亦 國恩列官



朝行撫巡兩闔久閱星霜子居 京師弱女相隨幽

間之操人所共推子當盛年忽遭氣疾發作無時動  
經旬日去歲之秋疾靛頗張以書告我我以爲常意  
者天相吉人當不久而康復胡造物者之不仁遂遽  
然而風燭嗚呼灰生世之大故夫婦人倫大綱子之  
疾也吾不得爲之矜視子之逝也吾不能與之永訣  
生歿異路各天一方雖有子而不得見遺弱息今誰  
與將翳秋雨今殘燈掩春風今洞房粧臺靜今月冷  
縑幃悄今夜長訃音遠來摧裂衷腸吾今年瀕五旬  
文集 卷之十二 十七  
鬚髮蒼蒼聰明弗及於前時視聽日就於渺茫既往  
之日多方來之日少而罹此不幸愈加痛傷旦夕男  
冕來京當扶柩以還故鄉庸擇吉地以妥靈光待吾  
瞑目而後與子同穴而藏此則吾之本心而亦人道  
之常子如有靈當於冥冥之中陰騭子女而盛而昌  
俾吾老不失所子於春秋祭祀亦有所望吾以 使  
命未卽還京因遣瓊英奠此一觴言有盡兮哀無窮  
身雖遠兮情弗忘淑靈不昧來格來嘗



先少保尚書平生所作詩文惟巡撫梁晉時爲  
多迨歸兵部適僱助勦之秋也雖日不暇給而  
猶不廢揮灑然亦罕矣不幸奸讒構難原燎烈  
烈片隻不遺痛可言哉越至天順甲申恭遇

聖明嗣統明年改元

聖政惟新

渥恩汪濊漏澤九京沉寃昭雪不肖孤亦得効天

馬馳驅

輦下亟訪舊稿無得僅於士林得抄錄者計若干

文集

卷之十二

十八

首如梁晉所作得之都憲無錫楊公今南昌二  
守同邑夏世芳兵部所作得之少宰崑山葉文  
莊公今祠部主事表弟董序近於鄉曲之家又  
得公進士御史時所作若畫魚葡萄諸詩所謂  
存什一於千百也嗚呼痛哉然以屢經謄寫中  
間魚豕雜然去年秋得

告南還南京大理寺卿仁和夏先生致政家居間  
求是正先生欣然爲之手校而又序其首簡因  
題之曰節菴先生存稿時一展誦豈勝痛憤之



極嗚呼天地無終窮此痛曷終窮哉惟先公德  
行政事之大載之

國史著之人心千載一日也此其支餘然亦不可  
不傳故用謹刻諸梓若天假之以年當極搜羅  
以爲續稿泣血再拜謹書以俟成化十二年歲  
次丙申冬十月初吉孤子于冕識

文集

卷之十二

十一

大河甲子十月廿七日吉

以爲續稿泣血再拜謹書以俟成化十二年歲

不傳故用謹刻諸梓若天假之以年當極搜羅

國史著之人心千載一日也此其支餘然亦不可

以爲續稿泣血再拜謹書以俟成化十二年歲

不傳故用謹刻諸梓若天假之以年當極搜羅

